

THATIPHA ZAWHANA ROPA

1

Bi sahpa lata a vaw lina

1 A thaona liata Bi a y, Bi cha Khazopa hnota a y, Bi cha Khazopa a cha.
2 Ano cha a thaona tawta Khazopa hnota pahra ta. **3** Ato zydua ano zawzi ta Khazopa ta tao ta; ano leipata khapahmata Khazopa ta a taopa y vei. **4** Bi liata hrona y ta, cha hrona cha chysazy khaina a cha. **5** A khaipa cha zona liata khai ta; a zona chata khaina cha pachhai thei bei vei. **6** Khazopa tuapa chysa pakha y ta, a mo cha Zawhana a cha. **7** Ano cha chysazy hnota khaina bi pahnosa awhpata a vy ta, amo pahnosa ta, a bi vata ama ngiapa thei nawpata. **8** Zawhana cha khaina cha leipata, khaina bi pahnosa awhpata a vypa tlo a cha. **9** Khaina hmeiseipa chysa to pakhaisa awhpa cha khizaw liata a zu ta. **10** Bi cha khizaw liata a y, Khazopa ta ano zawzi ta khizaw cha tao ta; chahrasala khizaw ta ano cha pahno vei. **11** Ano ra lia tlaita a zu ta; chahrasala ano chysazy ta aly tlo ei va. **12** Chahrasala thokha ano alypa, ano liata angiapapazy cha Khazopa sawzy cha thei nawpa bihneina a pi ei. **13** Chazy cha chysa pinazi hawta Khazopa saw a chapa cha leipa ei ta; chysapa paw ta a sapa sawzy hawta cha hra vei ei; Khazopa tlai cha ama Paw tlo cha tlo ta. **14** Bi cha chysa hropa lata a vaw li ta, eima hry liata a pahra. A ronana hmo hawh pi ta, ngiachhina nata hmeiseina ta a bi. Cha ronana cha Paw Sawchapawpa matlupa ronana a cha. **15** He he Zawhana ta ano a pahnosana cha a cha, "He chysa he he hawta a thati ei reipa kha a cha, 'Ei hnolata a vypa he, keima hlata tlo rona via ta', ano cha ei pi hlata a y hapa cha tlo ta," tah ta. **16** A pakina tawta ngiachhina eima to chyu, ngiachhi chota ngiachhi pachhuana chhao. **17** Khazopa ta rypa cha Mawsi hmapata pi ta, ngiachhina nata hmeiseina deikua cha Krista zawzi ta a vaw ypa a cha. **18** Ahyhma ta Khazopa hmo bei vei ei, Sawchapawpa matlupa, Paw ku chacha lata atyupata, ano a paluasa ty.

Batitupa Zawhana pahnosana

19 Zuzy ta, "Ahy na cha?" tahpata hiahri awhpata Zerusale khi tawta ano lata theithaipazy nata Livaizy ama tua nona khata, hezy he Zawhana bi pahnosapa cha a cha. **20** A phi leipata, a palaha ta, "Mesiah cha va na," tahpata. **21** Cha khiacha, "Ahye na cha? Elaiza na cha ma?" tahpata amo chata hiahri ei ta. Ano chata "Cha va na," tah ta. "Hrosopa kha na cha ma?" tah ei ta. Ano chata, "Cha va na," tah ta a chhy ta. **22** Amo chata a hnota. "Cha khiala ahy e na cha? Mania tuatupazy eima chhy thei nawpata mania chho te. Na thati rai kheita e na rei awh?" tah ei ta. **23** Zawhana chata, "He he ei cha: 'Abeipa lathlo parai te u! tahpata rapatho liata awtupa ao khaw,' cha cha hrosopa Isai ta a vaw rei hapa hawna khata," tah ta. **24** Ama tuapazy cha Pharisaizy tawtapa cha ei ta. **25** Amo chata a hnota, "Mesiah tlyma, Elaiza tlyma, Hrosopa tlyma chha na cha tlo leipa khiata cha, khazia e na bati ty tly?" tahpata hiahri ei ta. **26** Zawhana ta ama hnota, "Keima ta ti ta ei cha bati ty ei, nama hry liata chysa pakha nama pahno leipa a dua, **27** ano cha ei hnolata a vypa cha ta, a pheiky ri pathla tia chhao cha va na," tah ta a chhy ta. **28** Cha hmozy cha Zawda haosa Bethani khi liata Zawhana ta a batina liana khata a vaw tlo.

Khazopa Mitakupa Tawh

29 A myla ta Zawhana ta Zisu ano lata a vypa hmo ta, ano ta, "Mo te u, Khazopa Mitakupa Tawh khizaw molei sikheitu awhpa hu! **30** He chysa he he hawta a thati ei reipa kha a cha: 'Ei hnolata a vy pa he, keima hlata tlao rona via ta', ano cha ei pi hlata a y hapa cha tlo ta. **31** Ano cha ahyma a cha pahno va na, chahrasala he he ei vyna chhapa cha a cha, ti ta bati awhpata, ano cha Izarelzy hnota a pahnosana thei nawpata," tah ta. **32** He he Zawhana ta pahnosana bi a reipa cha a cha; "Thlahpa vachhu hawta ava tawta za chopa hmo na ta, a cho liata a cho ta. **33** Ano cha pahno to leipa na ta; chahrasala Khazopa ti ta bati awhpata na tuatupa khata ei hnota, 'Ahy cho liata rai Thlahpa a za chopata a cho liata a ypa na hmopa cha, ano cha Thlahpa Pathaipa ta batitu awhpa cha a cha,' na tah ta. **34** Cha

cha hmo ha na ta, he he Khazopa Sawchapawpa a cha tahpa nama hnota ei pahnosa," tah ta.

Zisu pachupa hmia tuachaipazy

35 A myla pata Zawhana a dua ta, a pachupazy pano chhaota; **36** Zisu a khikha nota hmo ta, "Mo te u, Khazopa Mitakupa Tawh hu!" tah ta. **37** A pachupa pano chata a bi reipa cha thei ei ta, Zisu zi hawh ei ta. **38** Zisu a hei ta, ama vaw zipa hmo ta, ama hnota, "Khapa nama tlua?" tah ta. Amo chata, "Rabai" (cha cha Pachutupa tahna a cha), "Khatai liata ma na y?" tah ei ta. **39** Ano ta ama hnota, "A vy ula, nama hmo aw h," tah ta. Chatanachata vaw ei ta, a yna cha hmo ei ta; cha nona chata ano hnota y thla ha ei ta, zala daw pali ra chho cha ta. **40** Zawhana bi reipa cha theipata Zisu a zitupazy pano hryta pakhapa cha Adru, Saimaw Pity unawpa a cha. **41** Ano chata a hmiatuata a unawpa Saimaw hmo ta a hnota, "Mesiah eima hmo hawh," tah ta, (cha cha Krista tahna a cha). **42** Chatanachata Zisu lata a vaw chhi ta, Zisu ta ano cha vaw mota, "Zawhana, sawchapawpa Saimaw na cha, Sifasa bipa na cha aw h," tah ta, (cha cha Pity tahna cha ta a yzi cha Lopano tahna a cha.)

Phili nata Nathanael Zisu ta a awna

43 A myla pata Zisu chata Kalili ra la si a chhua ta. Phili hmo ta, a hnota, "Na zi te," tah ta. **44** Phili cha Besaida khipa a cha, cha cha Adru nata Pity yna a cha. **45** Phili chata Nathanael hmo ta, a hnota, "A thati Mawsi ta rypa chabu liata a ropa nata hrosopazy ta ama ropa kha, ano cha eima hmo hawh, Nazari Zisu, Zawsi sawchapawpa cha," tah ta. **46** Nathanael chata a hnota, "Nazari khi tawta hmo phapa a pua thei ma?" tah ta. Phili chata a hnota, "A vy la, mo tua," tah ta. **47** Zisu ta Nathanael ano lata a vy haipa hmo ta, a thati rei ta, "Mo te u, Izarel chysa hmeiseipa, haidihaiduana rai a hnei leipa hu!" tah ta. **48** Nathanael chata a hnota, "Na ta kheita e eina pahno chi?" tah ta. Zisu ta a hnota, "Phili ta a cha aw hlata, theiku thaby liata na y nona khata, ei cha hmo mata," tah ta a chhy

ta. **49** Nathanael ta a hnota, "Rabai, Khazopa Sawchapawpa na cha! Izarelzy Beichaipa na cha!" tahpata a chhy ta. **50** Zisu ta a hnota, "Theiku thaby liata ei cha hmo mata, ei cha tahpa vata na ngiapa ma? Hezy hlata hmo rona viapa na hmo awh," tah ta a chhy ta. **51** Zisu ta a hnota, "Hmeiseitata, ei cha chho ei, ava a pahypa nata Khazopa valyuchapazy Chysa Sawchapawpa cho liana heta chopo nata kiapa nama hmo awh," tah ta.

2

Kena liata ahneina

1 No tho nota Kalili ra liata Kena khi liana cha ahneina y ta, cha liana chata Zisu no a y; **2** Zisu nata a pachupazy chhao ahneina a hlao awhpata hrua ei ta. **3** Chatawcha kresawti cha a dai khao leipata, Zisu no chata a hnota, "Kresawti ama phahla ha na," tah ta. **4** Zisu ta a hnota, "Ei na, nama pachapa cha, keima pachapa cha vei? Ei daiti tlo ma vei," tah ta. **5** A no ta chakaotupazy hnota, "Nama hnota a reipa mai cha tao lyma mu vy," tah ta. **6** Zuzy pasi pathaina yzi hawta lo bei rai miacharu, kho sypali su no tlyma, su tho tlyma a tlo chyupa cha liana chata patyu ei ta. **7** Zisu ta ama hnota, "Lo beiraizy ti pabi te u," tah ta. Chatawcha a kia a chipata pabi chy u ei ta. **8** Ama hnota, "Atahma thai ula, chotlahpa hyutupa lata vawkhei te u," tah ta. Chatawcha vawkhei ei ta. **9** Chotlahpa hyutupa chata ti kresawti lata a lipa cha pacha ta, a puanazi pahno leipata, ti a thaitupa chakaotupazy deikua chata pahno ei ta, lapino a hnei awhpa cha aw ta. **10** a hnota, "Chysa to ta hmiatua ta kresawti phapa ama papua ty; a hlu via ama do tawta a pha lei viapa ama papua ty; na cha atahma taita kresawti phapa na khai thla hapa he," tah ta. **11** Zisu ta he a hmonoapa tao pathao tuana he Kalili ra Kena khi liata tao ta, a ronazi palasa hawh ta; a pachupazy chata ano cha a ngiapa ei ta. **12** Cha tawna chata Kapynia khi lata zu ta, ano nata a no nata a unawzy nata a pachupazy chhaota; cha liana chata no chyta y ei ta.

Achhyna-o pathaina

13 Zuzy Zawpakho kychhi a hnia ha ta, Zisu Zerusale khi la khy ta. **14** Khazopa achhynao liata viachaozy, mitakupazy, vachhuzy a zuatupa sahlao nata taka a ritupa sahlao atyupa hmo ta. **15** Chatawcha khawhri charipata chheina tao ta, mitakupa nata viachao, a zydua ta Khazopa achhynao tawta papua ta; taka ritupazy taka cha leitha ta, ama tlakhaizy chati pathla hra ta. **16** Chatawcha vachhu a zuatupazy hnona chata, "He hmozy he he tawna heta sikhei te u; ei Paw o sodaona o ta tao kha u," tah ta. **17** "Na o liata ei phahnaikhona ta eina ni khai awh," tahpa ropa a cha tahpa a pachupazy chata thei ei ta. **18** Zuzy ta a hnota. "He hmozy na taopa he pahnona khapa mania na pahmosa thei," tah ei ta. **19** Zisu ta ama hnota, "He o he parao ula, no tho chhota ei padua awh," tah ta a chhy ta. **20** Zuzy chata, "He o he ko sypali nata ko charu sapa a cha, na ta no tho chhota na padua awh ma?" tah ei ta. **21** Chahrasala ano popa achhynao ky a reipa tlao a cha. **22** Chavata athipa hry tawta a thyu nata cha ky cha a rei hawh tahpa a pachupazy ta a thei ei ta; Khazopa cha bi nata Zisu bi reipa cha ama ngiapa hawh.

Zisu ta chysa zydua a pahno

23 Zawpakho kychhi liata Zerusale khi liata a y nona chata, a hmonoapa taopazy hmo ei ta, chysa hlupi ta ano a ngiapa ei ta. **24** Chahrasala Zisu cha amo liata a nopei vei, **25** chysa zydua pahno ta, chysapa ky ahyhma chhopasia a byu leipa vata; ano ta chysapa pathipalo liata a ypa mai cha pahno tlo ta.

3

Zisu nata Nikadima

1 Pharisaizy hry liatapa chysa pakha a mo Nikadima, Zuzy hyutupa a y. **2** Cha chysa cha za ta Zisu la a vy ta, a hnota, "Rabai, Khazopa tawta pachutupa ta a vya na cha tahpa eima pahno; Khazopa a cho liata a y

leipa khiatala he hmonoapa na taopa hawpazy he ahyhma ta tao thei aw h
vei ei," tah ta. **3** Zisu ta a chhy ta a hnota, "Hmeiseitata, hmeiseitata; ei
cha chho, chysa ahyrai choia tawta a pipathi leipa khiatala Khazopa
Khinara hmo thei aw h vei ei," tah ta. **4** Nikadima ta a hnota, "Chysapa a
pawpi tawta kheita e a pi thei aw h? A no chhi liata ei no a ngiapata a pi
thei aw h ma?" tah ta. **5** Zisu ta a chhy ta, "Hmeiseitata, hmeiseitata, ei cha
chho, chysa ahyrai ti ta nata Thlahpa ta ama pi leipa khiatala Khazopa
Khinara liata a ngia thei aw h vei ei. **6** Sahpa ta a pipa mai sahpa a cha,
Thlahpa ta a pipa ma thlahpa a cha. **7** 'Na pi pathi aw hpa a cha,' ei cha
tahpa he na noa kha sa. **8** Thli khataila rai a khona maita a pathli ty, a pyu
na thei, chahrasala khatai tawta a vypa ma, khatai la a si aw h tahpa pahno
tlo chi va; ahyrai Thlahpa ta a pipa cha, cha hawta ama y," tah ta. **9**
Nikadima ta a chhy ta, "Cha hmo cha kheita e a y thei aw h?" tah ta. **10**
Zisu ta a chhy ta, "Izarelzy pachutupa cha tlo chi ta, chazy cha na no a va
vei ma? **11** Hmeiseitata, hmeiseitata, ei cha chho, keimo ta eima pahnop
a cha eima rei ty, eima hmopa cha eima pahnosa ty; chahrasala eima bi
pahnosapa zo ty tlo vei ei chi. **12** Khizaw hmo ei cha chhopa hmata nama
zo leipa he, ava hmozy cha chho aw h ei sala kheita e nama zo aw h? **13**
Ava la ahyhma kia bei vei ei, ava tawta a za chop a Chysa Sawchapawpa
dei leipa ta cha. **14** Mawsi ta rapathopa liata pari a chaluapa hawna khata,
Chysa Sawchapawpa he chaluapata a y hra aw hpa a cha, **15** ahyrai a
ngiapapa maita ano vata chhazaw hrona ama hnei nawpata. **16** Khazopa ta
khizaw ky pacha ngaita ta, chatanachata a Sawchapaw matlupa pi ta, ano
cha ahyrai a ngiapapa mai leidia leipata, chhazaw hrona tlo ama hnei
nawpata. **17** Khizaw thai lei pachasa nawpata Khazopa ta a
Sawchapawpa khizaw liata a tuapa cha vei, khizaw ano vata pachhahpata
a y thei nawpata a tuapa tlo a cha. **18** Ahyrai ano a ngiaapa cha thai lei
pachasapata y aw h vei; ahyrai a ngiapa leipa cha atahma bawlaw ta thai
lei pachasapata a y; Khazopa Sawchapaw matlupa mo a ngiapa leipa vata.
19 He he thai lei pachasana a cha, khaipa cha khizaw liata a vy ta,
chahrasala chysazy ta khaipa hlata zopa ama kho via, ama hmotaopazy a
moleipa vata. **20** Ahyrai hmo a paraopa mai ta khaipa a hao ty, khaipa lata
chhao a vy vei, chata leipata cha a hmotaopazy a la aw h. **21**

Anodeikuacha ahyrai a dopata a taopa mai, a hmotaopazy Khazopa vata a taopa a cha tahpa a la nawpata khaipa lata a vy ty," tah ta.

Zisu nata Zawhana

22 Cha tawna chata Zisu a pachupazy chhaota Zudia ra la si ei ta; cha liana chata Zisu ama hnota y ta, bati pachasa ta. **23** Zawhana chhaota Anawna liata Sali khi kiapa liata bati pachasa hra ta, cha liana chata ti a hlupa vata; chatawcha zawpi a hnota a vy ei ta, bati amo pachasa ta. **24** Cha nona chata Zawhana cha patana o liata khopa cha ma tlo lei kha ta. **25** Zawhana pachupazy nata Zu chysa pakha pasipathaina ky liata a eina hnei ei ta. **26** Zawhana la a vy ei ta, a hnota, "Rabai, Zawda haosa ta na hnota a ypa a thati na pahnosapa khata, chysa bati pachasa ta, chysa zydua ano lata ama vy," tah ei ta. **27** Zawhana ta a chhy ta, "Chysapa ta khapahma hnei thei vei ei, ava latapa pipa a cha vei khiatala. **28** Kei Mesiah cha va na, a hmialata tuapa ei cha, ei tahpa kha, namo tlai na pahnokheitupazy nama cha. **29** Myuhneitupa cha a vahpa cha a cha; chahrasala vahpa viasa a duapa chota a bi a theipa cha, vahpa ao vata aly ngaita ty; chavata ei lyna a tlo hawh hi. **30** Ano cha a patha rili awhpa a cha, kei deikua cha a naw awhpa ei cha," tah ta.

Ava tawta a zupa

31 Choia tawta a zupa cha chysa zydua hlata chono chaipa a cha; alei liata a pipa cha alei chysa cha ta, alei ky a rei ty; ava tawta a zupa cha chysa zydua hlata chono chaipa a cha. **32** A hmopa nata a theipa mai a pahnosapa ty; ahyhma ta a bi pahnosapa zo vei ei; **33** a bi pahnosapa a zopa chata. Khazopa cha a do ngaitapa a cha tahpata a mo chahnaopata a ro. **34** Khazopa tuapa chata Khazopa bi a rei ty, ano chata panua cheingeipata Thlahpa pi tip lei kha ta; **35** Paw ta Sawchapawpa ky pacha ta, a ku liata ato zydua a pi hawh. **36** Ahyrai Sawchapawpa a ngiapapa maita chhazaw hrona a hnei hawh; chahrasala ahyrai Sawchapawpa bi a zo leipa maita hrona hnei awh vei ei, Khazopa hihana a cho liata tlo a y," tah ta.

Zisu nata Samari chano

1 Zisu ta Zawhana hlata pachupa hlu via a taopa nata bati a pachasapa Pharisaizy ta ama thei tahpa Abeipa chata a pahno patanata, **2** (chahrasala Zisu tlaita bati pachasa vei, a pachupazy ta bati tloao ama pachasa ty), **3** Zudia ra cha sisai ta, Kalili ra lata kua hei ta. **4** Samari ra a si pahli awpha a cha. **5** Chatanachata Samari ra khi miakha Saika ama tahpa cha vaw tlo ta. Zakaw ta a saw Zawsy hnota su a pipa kiapa liana cha. **6** Zakaw tikhaorei chhao cha liana chata a y, chatanachata Zisu cha a si ritheipa vata tikhaorei kia liana chata a tyu ta. Nochho nota cha ta. **7** Samari chano pakha ti thapata a vy ta. Zisu ta a hnota, "Do awpha na pi te," tah ta. **8** A pachupazy cha nipa chalei awhpata khi la si hawh tlo ei ta. **9** Samari chano chata a hnota, "Na. Zu chysa cha chi ta, kei Samari chano cha tlo na ta, kheitazi ta e do awpha eina hia chi?" tah ta. Zuzy ta Samari chysazy khapa ta hma hma bei tlo lei kha ei ta. **10** Zisu ta a chhy ta a hnota, "Khazopa hmopipa nata, 'Do awpha na pi te,' cha tahtupa he a pahnopa cha la, nama ta a hnota tloao na hia awpha cha ta, ano ta ti hropa a cha pi ha ba awpha a cha," tah ta. **11** Chano ta a hnota, "Papu, thaina khapahma hnei tlo lei kha chi ta, tikhaorei a thu thla bao nata; khatai liatapa ma ti hropa cha na hmo? **12** Eima mapaw Zakaw hlata na rona via ma? Ano chata he tikhaorei he mania pi ta, ano chhaota do ta, a sawchapawpazy, a sahrozy chhaota," tah ta. **13** Zisu ta a chhy ta a hnota, "Ahyrai he ti a dopa mai a da a phi hei awh, **14** ahyrai a hnota ei pi awpha ti a dopa mai deikua cha a da phi khao awh vei; kei ta a hnota ti ei pi awpha cha, a chho liata tihyaw y awh ta, chhazaw hrona taita a kaw pali awh," tah ta. **15** Chano chata a hnota, "Papu, cha ti cha na pi te, ei da a phi lei nawpa nata he tiapara ti thai awhpata ei vy ty lei nawpata," tah ta. **16** Zisu ta a hnota, "Na vahpa kei aw la, he la a vy hei ma y," tah ta. **17** Chano chata a hnota, "Vahpa hnei va na," tah ta a chhy ta. Zisu ta a hnota, "Vahpa hnei va na," na tahpa he na reipa a do na; **18** vahpa papangaw na hnei hawh, atahma ta na hneipa he na vahpa a cha leipa raina a cha; he bi he na reipa a do na,"

tah ta. **19** Chano chata a hnota, "Papu, hrosopa na cha tahpa ei pahno hawh. **20** Keimo pathlahtupazy chata he tia liana heta Khazopa ama chhy ty; chahrasala namo ta la chysapa ta Khazopa ama chhyna su awHPa cha Zerusale khi liata a y, nama tah ty," tah ta. **21** Zisu ta a hnota, "Chano, ei bi zo te, he tia cheingei leipa liata chhao, Zerusale khi cheingei leipa liata chhao, Paw nama chhyna daiti a tlo awH. **22** NamO ta nama pahno leipa nama chhy ty; keimo ta la eima pahnopa cha eima chhy ty, pachhahna Zuzy tawta vaw pua tlo ta. **23** Chahrasala a daiti a tlo daima, atahma chhao a tlo hawh, cha tina chata Khazopa achhytupa hmeiseipazy ta thlahpa nata hmeiseipata Paw ama chhy awH, Paw ta cha hawpa cha achhytu awHPata a tlua. **24** Khazopa cha Thlahpa a cha, achhytupazy ta thlahpa nata hmeiseipata ama chhy awHPa a cha," tah ta. **25** Chano chata a hnota, "Mesiah (Krista ama tahpa cha) a vy awH tahpa ei pahno; ano cha a vy tita ato mania a chho awH," tah ta. **26** Zisu ta a hnota, "Keima bi cha chhotupa na he ano cha ei cha mata," tah ta. **27** Cha nona chata a pachupazy cha a vy ei ta. Chano bi a chhopa cha ama noa kawh ta, chahrasala ahyhma ta, "Khapa na kho?" tlyma "Khazia chano bi na chho?" tlyma tah vei ei. **28** Chatawcha chano chata a ti beirai sisai ta, khi la si ta, chysazy hnota, **29** "Ei hmotaopa mai na chho lymatupa chysa pakha y ta a vy ula, mo te u. Mesiah a cha thei awH tlyma?" tah ta. **30** Chatawcha amo cha khi tawtapa cha vaw pua ei ta, ano la pangai ei ta. **31** Cha chhona chata pachupazy chata a hnota, "Pachutupa y, ni te," tah chaima ei ta. **32** Chahrasala ano chata ama hnota, "Pati nama pahno leipa ni awHPa ei hnei na," tah ta. **33** Chatawcha pachupazy chata amo nata amo liata, "A ni awHPa chysa ta ama vaw chei pa tlyma?" a tah ei ta. **34** Zisu ta ama hnota, "Na tuatupa khopa taopa nata a raihria palo awHPa he ei pati a cha. **35** NamO ta, 'Sa hria a dai nawpata thla pali a byu,' tah vei ei chi ma? Nathli te u, ei cha chho ei hi, sai ula, lyuzy mo te u, atahma hmata hria awHPata a mai hawh. **36** A hriatupa ta hlao hmo ty ta, chhazaw hrona taita a y awHPata a theipa a hria ty, a tutupa nata a hriatupa ama ly rairi thei nawpata; **37** 'Pakha ta tu ty ta, mo hropa ta a hria ty,' tahpa bi he cha liana chata a do kawHPa a cha. **38** Nama hria pasa leipa hria awHPata ei cha tuapa ei kha; mo hropa ta hria ei ta, namO ta ama hria chipa cha nama

pazao," tah ta. **39** Chano ta, "Ei hmotaopa mai eina chho lyma," tahpata a pahnosapa vana khata, cha khi liata a ypa Samari chysa hlupi ta Zisu angiapa ei ta. **40** Chatanachata Samari chysazy cha Zisu la a vy ei ta, ama hnota a y awhpata a haw chaima ei ta; cha liana chata no no cha ta. **41** Chatawcha mo hropa hlupi ta ano bi vata a ngiapa hra ei ta. **42** Amo chata chano hnota, "Atahma la na bi reipa vata angiapapa cha khao ma pi, keimo tlaita a bi thei pi ta, he he khizaw Pachhahtupa a cha tlai tahpa eima pahno hawh," tah ei ta.

Zisu ta molaipa saw a patlana

43 No no a y tawna chata cha tawta pua ta. Kalili ra la si ha ta. **44** Zisu tlaita hrosopa cha ano khi liata palyupalipata y bei vei tahpa pahnos ty tlo ta. **45** Chatanachata Kalili ra a vaw tlo nata, Kalili chysazy ta a vaw ly ei ta, Zerusale khi liata Zawpakho kychhi nota a hmotaopa zydua ama hmopa vana khata, amo chhao cha kychhina lana chata si tlo hra ei ta. **46** Kalili ra liata Kena khi, ti kresawti lata a pachasana kha vaw tlo hei ta. Macha ahy tlyma y ta, a sawchapawpa Kapynia khi liata tia leipata. **47** Zisu Zudia ra tawta Kalili ra la a vy tahpa a thei patanata ano la si ta, a sawchapawpa vaw patla awhpata a haw chaima ta, thi daima tlo ta. **48** Zisu ta a hnota, "Pahnosanazy nata hmonoapazy nama hmo vei khiatala ngiapa chachei aw hvei ei chi," tah ta. **49** Macha chata a hnota, "Papu y, ei saw a thi hlata a zu ma y," tah ta. **50** Zisu ta a hnota, "Vaw thla ha te, na sawchapawpa cha a tia hawh," tah ta. Cha chysa chata Zisu ta a hnota bi a reipa cha zo ta si ha ta. **51** A zu hai nota, a seizy ta vaw dy ei ta, a sawchapawpa cha a tia hawhpa chho ei ta. **52** Ano chata ama hnota a tia tuana daiti hiahri ta, amo chata a hnota, "Zahia zala daw khapata a chasipa a lei," tah ei ta. **53** A paw ta Zisu ta a hnota, "Na sawchapawpa a tia hawh," a tah nona tlai cha a cha tahpa pahno ha ta; ano nata a chhokhazy ta ama zydua ta angiapa hawh ei ta. **54** Cha cha Zisu ta a hmotaonoapa a taopa ei nona a cha, Zudia ra tawta Kalili ra la a vy nota.

Tipo liata patlana

1 Cha hmozy hnolana chata Zuzy kychhi miakha y ta, Zisu Zerusale khi la khy ta. **2** Zerusale liana chata Mitakupa Ochhi kiapa liata tipo y ta, cha cha Hebrai rei ta Bezatha tah ei ta, oka miapangaw a hneipa cha ta. **3** Chazy liana chata tia leipa hlupi mochaopa zy, pheisypa zy, asipa zy a zia ei ta. Ti chatlaopa ha thla ei ta; **4** Abeipa valyuchapa tipo liata a zuna maita, ti cha chatlaosa ta. A tia leipa cha ti a cha tlaow tawta tipo la a vaw tuachaipa mai kheihawpa pasana taw raita patlapa cha lyima ei ta. **5** Cha liana chata ko sytho nata ko chari a pasapa chysa ahy tlyma y ta. **6** Zisu ta a ziapa cha hmo ta, cha hawta bopi a y hawhpa pahno ta, a hnota, "Patlana kho ma?" tah ta. **7** Chysa tlaleipa chata, "Papu y, ti a chatlao nata tipo liata na sotupa hnei leipa na ta, ei si chho ta mo hropa ta eina chhao ha ty ei," tahpata chho ta. **8** Zisu ta a hnota, "Thyu la, na hmophaw lah la, pheita si te," tah ta. **9** Chatawcbasokha ta cha chysa cha tia pa ha ta, a hmophaw cha lah ta, si ha ta. Cha no cha pahano cha ta. **10** Chatanachata Zuzy ta a tia hapa hnona chata, "Pahano a cha he, na hmophaw lah hrao awh va chi," tah ei ta. **11** Ano chata ama hnota, "Na patlatupa tlaita ei hnota, 'Na hmophaw lah la, pheita si te,' eina tah," tah ta a chhy ta. **12** Amo chata a hnota, "Na hmophaw lah la, pheita si te,' cha tahtupa cha ahy maw?" tahpata hiahri ei ta. **13** Chahrasala a tlapa chata ahyma a cha tahpa pahno leipata, cha liana chata zawpi ama ypa vata, Zisu si ha tlo ta. **14** A no hropa ta Zisu ta ano cha Khazopa achhyo liata hmo ta, a hnota, "Pacha te, na tia ha hi! Hmo parao khao kha, chata leipata la hmo pha lei pachai pa na cho liata a tlo pathlei awh na," tah ta. **15** Cha chysa cha si ta. Zuzy hnona chata a patlatupa cha Zisu a cha tahpa chho ta. **16** Chatanachata pahano ta cha hawpa hmozy cha a taopa vata Zuzy ta Zisu taola ei ta. **17** Chahrasala Zisu ta amo cha chho ta, ama hnota, "Ei Paw ta atahma tai chhaota rai a hria ty, kei chhaota ei hria ty," tah ta. **18** He vana heta Zuzy ta thih a chhua pachai hei ei ta, pahano a paraopa vata dei chhao cha leipata, Khazopa cha a Paw ta rei ta Khazopa tluta a taopa va chhaota a cha.

Sawchapawpa bihneina

19 Zisu ta ama hnota, "Hmeiseitata, hmeiseitata, ei cha chho ei, Sawchapawpa ta ano deita khapahma tao thei vei, Paw hmotaopa a hmopa dei leipata cha; hmo a taopa mai cha, Sawchapawpa chhaota a tao ty hra. **20** Paw ta Sawchapawpa ky pacha ta, a hmo taopa mai a pamosa ty; hezy hlata hmotao rona viapa he a pamosa awh, nama noa nawpata. **21** Paw ta athipazy pathyu ta a pahro typa vata, Sawchapawpa chhaota a khopa mai a pahro ty. **22** Paw ta ahyhma pachia bei vei, bi zydua Sawchapawpa tiao a pachiasa, **23** chysa zydua ta Paw ama zahpa hawta Sawchapawpa chhao ama zah nawpata. Ahyrai Sawchapawpa a zah leipa cha, Paw a tuatupa chhao a zah leipa a cha. **24** Hmeiseitata, hmeiseitata, ei cha chho ei, ahyrai ei bi thei ta, na tuatupa a ngiapapa cha chhazaw hrona a hnei hawh; thai lei pachasapa cha leipata thina tawtapa pua ta hrona liata tiao a ngia. **25** "Hmeiseitata, hmeiseitata, ei cha chho ei, a daiti a vaw tlo daima, atahma chhao a tlo hawh, cha tina chata athipazy ta Khazopa Sawchapawpa ao thei awh ei ta, a theipa maita ama hro awh. **26** Paw ta anosasy ta hrona hnaw a chapa hawta, cha hawna hra chata Sawchapawpa cha hrona hnaw cha hra awhpata a tao, **27** Chysa Sawchapawpa a chapa vata a hnota pachiana bihneina a pi. **28** Hezy he nama noa kha u; a daiti a tlo daima, cha tina chata thla liata a ypa zydua ta a ao thei awh ei ta, **29** ama pua khai awh, hmo phapa a taotupazy cha hrona topata thyu awh ei ta, moleina a taotupazy cha thai lei pachasapata ama thyu awh.

Zisu apahnosatupazy

30 "Keima kho ta khapahma tao thei va na; nahkhao ta ei theipa lyma hawta ei pachia ty, ei pachiapa cha a do, keima reisai ta y a chhua leipa na ta, na tuatupa reisai ta y tiao ei chhua typa vata. **31** Keima thati pahnosa awh sala, ei bi pahnosapa a do awh vei; **32** ei thati pahnosatupa cha mo hropa a cha, ano chata ei thati a pahnosapa cha a do tahpa ei pahno. **33** Namo ta Zawhana la chysa tua ei chi ta, ano chata a hmeiseina thati a vaw

pahnosa. **34** Bi pahnosapa ei pypa deikua cha chysapa bi cha vei; chahrasala pachhahpata nama y nawpata he bizy he ei rei. **35** Cha Zawhana cha meio pakhaipa nata khai ngaitapa cha a cha, a khaipa liana chata thahphapata y awhpa nama khopa kha. **36** Chahrasala pahnosana ei hneipa he Zawhana pahnosana bi hlana khata a rona viapa a cha. **37** Paw na tuatupa chata ei thati a pahnosa hawh. Namo ta khati nota hma a ao thei bei leipa ei chi ta, a hmia chhao hmo bei hra vei ei chi; **38** a bi chhao nama palorupa liata a vao vei ei chi, a tuapa nama ngiapa leipa vata. **39** Khazopa cha bi nama rei ty, a chho liata chhazaw hrona a ypata nama pangiasapa vata; cha Khazopa chazy cha ei thati pahnosatupa cha tlo ta; **40** chahrasala hrona hnei awhpata keima la a vy kho tlo ei chi va. **41** Chysapa palyupalina a py va na. **42** Namo ei cha pahno ei, Khazopa kypachana nama palorupa liata hnei vei ei chi. **43** Ei paw mo ta a vypa ei chapa he, namo ta na ly tlo ei chi va; mo hropa ano mo ta a vy sala, ano cha nama ly awh. **44** Namosasy ta a palyupali rairipa alypazy sai u, kheita e nama ngiapa thei awh, Khazopa hmeiseipa dei tawta a puapa palyupalina cha tlua tlo ei chi va? **45** Keima ta Paw lata ei cha leipa ei pangiasa kha u; namo cha leitupa a y, nama ngachhapa Mawsi hi. **46** Mawsi nama ngiapa khiatala kei chhao eina ngiapa awhpa ei chi a cha, ano chata keima thati ro tlo ta. **47** Chahrasala bi ropa cha nama ngiapa tlo vei khiata cha, kheita e ei bi nama ngiapa thei awh?" tah ta.

6

Sa pangaw ri a pabi

1 Cha hmozy hnolana chata Zisu cha Kalili Tipo, Taibiria Tipo ama tahpa haosa lana chata si ta. **2** Tla leipazy chota hmonoapa a taopazy ama hmopa vata zawpi hlupi ta ano zi ei ta. **3** Zisu cha tia la khy ta, cha liana chata a pachupazy hnota a tyu ta. **4** Zuzy Zawpakho kychhi cha a hnia ha ta. **5** Zisu mohmia pasai ta, zawpi hlupi ano la ama vaw pangaipa hmo ta, Phili hnota, "He sahlao ni awhpa viachha khatai tawtapa e eima chalei awh?" tah ta. **6** Cha bi cha ano pasia nawpata a reipa a cha, a tao awhpa

cha ano ta pahno thla ha tlo ta. **7** Phili chata a hnota, "Chysa to ta a chyta ama to chyu awpha chhao taka za no ma viachha ta a dai aw h vei," tah ta a chhy ta. **8** Pachupazy hryta pakha Saimaw Pity unawpa Atru chata a hnota, **9** "Bali viachha tia pangaw nata ngahsa miano a hneipa chapaw hawti pakha he liata a y; chahrasala he zydua hry liana heta chazy cha khapa dida a cha aw h?" tah ta. **10** Zisu ta, "Chysazy cha patyusa te u," tah ta. Cha su liana chata sibipa hlupi a y, chatanachata zawpizy cha atyu ei ta, ama hluna la cha chapaw pitlopa sa pangaw rachho cha ei ta. **11** Zisu ta viachhazy lah ta, alyna bi a rei khainata atyupa sahlaozy hnona chata rai ta; cha hawna hra chata ngahsazy chhao ama khozi ta rai hra ta. **12** Ama ri a bi tawta, a pachupazy hnona chata, "Khaphama a lei lei aw hpata a laibapa a zopazy cha a hua te u," tah ta. **13** Chatanachata a hua ei ta, bali viachha tia pangaw a nitupazy ni bapa a zopazy cha hraby miahrawhleino pabi ei ta. **14** Chysazy chata hmonoapa a taopa cha ama hmo nata, he chysa he hrosopa khizaw liata a vy aw hpa kha a cha tlai hi!" tah ei ta. **15** Chatanachata ano cha abei ta tao aw hpata patu rarua a chhuapata ama vy aw h tahpa Zisu ta pahno ta, tia lata ano deitata si ha ta.

Ti cho liata Zisu a si

16 A vaw zala nata a pachupazy cha tipo lana cha zu ei ta, **17** baly kia ei ta, tipo liana chata Kapyriia khi pangai ei ta. Chatawcha zo ha ta, Zisu hra cha ama hnota vaw tlo ma va. **18** Thlipi ru ngaitapa a pathlipa vata ti chatlaopa a sa via nga tlo ta. **19** Pachupazy cha me tho tlyma, me pali tlyma ama hia nata Zisu cha tipo cho liana chata pheii ta sipata baly a vaw hniapa hmo ei ta, chi ei ta, **20** chahrasala ano chata ama hnota, "Keima na ei cha; chi kha u," tah ta. **21** Chatanachata baly liata pakiasa aw hpa kho ei ta, sokha ta baly chata ama pangaipa ra cha tlo pa ha ta.

Zawpi ta Zisu ama tluapa

22 A myla ta cha tipo haosa lata zawpi aduapazy chata baly miakha leipata cha baly hropa y leipata, a pachupazy amo delta ama si tahpa

pahno ei ta. **23** Chahrasala Abeipa ta alyna bi a rei khainata viachha ama nina su kiapa liana khata Taibiria khi tawta balyzy vaw tlo tlo ta. **24** Chatanachata zawpi chata Zisu nata a pachupazy ama y khao leipa ama pahno nata amo chhao balyzy liata kia ei ta, Zisu tluapata Kapynia khi vaw tlo ei ta.

Zisu hrona viachha

25 Tipo haosa liata ama vaw hmo nata a hnota, "Rabai, khatita hela na vaw tlo?" tah ei ta. **26** Zisu ta ama hnota, "Hmeiseitata, hmeiseitata, ei cha chho ei, hmonoapazy nama hmopa vata na tluapa cha leipa ei chi ta, viachha nama py a bipa vana khata tlo a cha hi. **27** Pati a leilo theipa teihpata hriapasa kha u, chhazaw hrona taita a y thla ha awpha pati, Chysa Sawchapawpa ta a cha pi awpha cha tlo teih te u; Paw Khazopa ta ano cha pahnosa hawh tlo ta," tah ta a chhy ta. **28** Chatawcha amo chata a hnota, "Khazopa rai eima hria thei nawpata hmo khapa eima tao awh?" tah ei ta. **29** Zisu ta ama hnota, "Khazopa raihria cha he he a cha, a tuapa he a ngiapa ula," tah ta a chhy ta, **30** Amo chata a hnota, "Pahnona khapa na tao awh, hmo ei sila eima cha ngiapa thei nawpata? Hmo khapa na tao awh? **31** Mania pathlahtupazy ta rapathopa liata mana kha ama ni ty; 'Ava tawna chata ama hnota viachha nipa a pi,' tahpa ropa hawta," tah ei ta. **32** Zisu ta ama hnota, "Hmeiseitata, hmeiseitata, ei cha chho ei, ava tawta viachha nama hmopa kha Mawsi ta a cha pipa ei cha vei; ei Paw deikua chata ava tawta viachha hmeiseipa a cha pi ei hi. **33** Khazopa viachha cha ava tawta a zupa, khizaw lata hro a pitupa he a cha," tah ta. **34** Amo chata ano hnota, "Abeipa, cha viachha cha kha mania pi ma y," tah ei ta. **35** Zisu ta ama hnota, "Kei he hrona viachha cha ei cha; ahyrai ei hnota a vypa cha a no di awh vei, na ngiapapa cha khatita hma a da phi awh vei. **36** Chahrasala namo ta na hmo ei chi ta, na ngiapa tlo ei chi va, tahpa ei cha chhopa ei kha. **37** Paw ta eina pipa mai ei hnota ama vy khai awh; ahyrai ei hnota a vypa cha papua cheita awh va na. **38** Keima khopa tao awhpata ava tawta a zupa cha leipa na ta, na tuatupa khopa tao awhpata a zupa tlo ei cha; **39** he he na tuatupa khopa cha a cha, ano ta

eina pipa zydua khapahma pahlei leipa awh sala, no chhana no liata tlaopathyu awh sala. **40** He he ei Paw khonazi a cha, ahyrai Sawchapawpa hmo ta a ngiapapa maita chhazaw hrona hnei sala; kei ta no chhana no liana chata ano ei pathyu awh," tah ta. **41** "Ava tawta viachha a za chopacha ei cha," a tahpa vata Zuzy cha a cho liata papho ei ta. **42** "He he Zawsisawchapawpa Zisu cha vei ma, a no nata a paw eima pahnopa he? 'Ava tawta a za chopacha ei cha,' tahpata kheitazi ta a tahpa ma a cha tly?" tah ei ta. **43** Zisu ta ama hnota, "Namo nata namo liata papho nga kha u, **44** Paw na tuatupa ta a sy vei khiatala ahyhma kei la a vy thei awh vei ei; keima ta no chhana no liana chata a vypa cha ei pathyu awh. **45** Hrosopazy chabu liata, 'Khazopa pachupata ama y khai awh,' tahpa ropacha. Chysa to Paw bi thei ta, achupa mai cha kei la ama vy ty. **46** Ahyhma ta Paw hmo bei vei ei, Khazopa tawta a za chopadei leipata cha; ano chata Paw cha a hmo. **47** Hmeiseitata, hmeiseitata ei cha chho ei, ahyrai a ngiapapa chata chhazaw hrona a hnei hawh. **48** Kei he hrona viachha ei cha. **49** Nama pathlahtupazy ta rapathopa liata mana kha ama ni tarawpata. thi ei ta. **50** He he ava tawta viachha a za chopacha a cha, chysa ta nipata a thi lei nawpata. **51** Kei he ava tawta viachha hropa a za chopacha ei cha; ahyrai ta he viachha he a ni khiatala chhazaw ta a hro thla ha awh; khizaw hro nawpata ei pi awhpa viachha cha ei sahpa he a cha," tah ta. **52** Cha chata Zuzy cha amosasy liata bi a eipata, "He chysa heta kheita ma a sahpa ni awhpata mania a pi thei awh?" tah ei ta. **53** Zisu ta ama hnota, "Hmeiseitata, hmeiseitata, ei cha chho ei, Chysa Sawchapawpa sahpa nipata a thisai nama do hra leipa khiatala, namo ta hrona hnei vei ei chi; **54** ahyrai ei sahpa ni ta ei thisai a dopa chata chhazaw hrona a hnei hawh, no chhana no liata ano cha ei pathyu awh. **55** Ei sahpa he pati hmeiseipa cha ta, ei thisai he dopa hmeisei cha tlo ta. **56** Ahyrai ei sahpa nipata ei thisai a dopa cha keima liata a y thla ha ty, kei chhao ano liata ei y thla ha ty. **57** Paw zawzi ta a hropa ei chapa haw hra ta, ahyrai na nipa cha keima zawzi ta ano chhao a hro awh. **58** He he ava tawta viachha a za chopacha a cha, chi pathlahtupazy chata viachha ni ei ta, ama thi hawpa kha cha vei; ahyrai he viachha a nipa he cha chhazaw ta a hro thla ha awh," tah ta. **59** Cha bizy cha apakhynao lata rei ta, Kapynia

khi liata a pachu nona khata.

Tlyzaw hrona bizy

60 A pachupazy a hlupi ta cha cha ama thei nata, "He he bi ru ngaitapa a cha, ahyma a tao thei awh?" tah ei ta. **61** Chahrasala cha ky liana chata a pachupazy ama paphopa Zisu ta a palorupa ta pahno ta ama hnota, "He ky heta palo cha leipata nama y ma? **62** Chysa Sawchapawpa he hmiata a yna tyla liata kiapata nama hmo khiatala kheita e nama tah awh? **63** Pahrotupa cha Thlahpa a cha, sahpa cha khapa lata hmata dyu tlai vei; nama hnota bi ei reipazy he, Thlahpa a cha, hrona chhao a cha. **64** Chahrasala nama hry liata thokha ngiapa leipa nama y na," tah ta. Zisu ta a ngiapa leipazy nata a patusatu awhpa cha, cha hia tawta pahno thla ha tlo ta. **65** Chatawcha ano chata hnota, "Cha vana chata nama hnota Paw ta a bao leipata cha ahyma ta kei la a vy thei awh vei ei, ei tahpa kha a cha," tah ta. **66** Cha khaina chata a zitupa thokha hlupi ta kuasai ei ta, ano a pahlao khao leipa ei ta. **67** Zisu ta pahrawhleinozy hnona chata, "Namo chhaota na sisai pa nama kho hra ma?" tah ta. **68** Saimaw Pity ta a hnota, "Abeipa, ahy la ma eima si awh, na ta chhazaw hrona bi na hnei mata; **69** na, Khazopa Mo Pathaipa cha na cha tahpa zo hawh pi ta, eima pahno ha hra," tah ta a chhy ta. **70** Zisu ta ama hnota, "Namo pahrawhleinozy chi he, keima a tlypa cha vei ei chi ma? Chahrasala nama hry liata pakha ahripa a cha," tah ta. **71** Iskari, Saimaw sawchapawpa Zuda, pahrawhleinozy hry liata a hlao hrapa ky kha a rei, ano cha a patusatu awhpa cha tlo ta.

7

Zisu unawpazy zo leina

1 Cha khai tawna chata Zisu ta Kalili ra chahry ta, Zuzy ta ano thih ama chhuapa vata Zudia ra cha chahry kho leipata. **2** Zuzy Byurei kychhi cha a hnia ha ta. **3** Chatanachata a unawpazy ta "Zudia ra la vaw te, na

pachupazy chhaota na hmotaopa he ama hmo thei nawpata. **4** Ahyhma ta a rula ta hmo khapahma tao vei, ano mo pa tha a kho tlo khiata cha. He hmozy he na tao tlai khiatala khizaw lata a pamosa te," tah ei ta. **5** A unawzy chhaota ano a ngiapa tlo lei kha ei ta. **6** Zisu ta ama hnota, "Ei daiti tlo ma vei, namo daiti deikua cha chhazaw ta a tlo thla hawh. **7** Khizaw ta namo cha hao thei vei ei, kei deikua cha eina hao ty, ama hmotaopazy a moleipa ei chhopasia typa vata. **8** Namu kychhina la khy te u; kei la atahma ta kychhi liana heta khy ma awh va na, ei daiti a tlo ma leipa vata," tah ta. **9** Cha bizy cha ama hnota rei ta, Kalili ra liata y thla ha ta.

Byurei kychhi liata Zisu a o

10 Chahrasala a unawpazy kychhina la ama khy ha tawna chata, ano chhao vatla pahno leipata a rula ta khy hra ta. **11** Zuzy ta kychhina liata ano cha tlua ei ta, "Khatai liata a y?" tah ei ta. **12** Chatawcha a cho liata zawpizy hryta papho hold ei ta. Thokha ta, "Chysa phapa a cha," tah ei ta, thokha ta, "Cha bao va, zawpi tlo a do ty," tah ei ta. **13** Chahrasala Zuzy ama chipa vata ahyma ta a thati a laha ta rei vei ei. **14** Kychhi locho nota Zisu Khazopa achhynao la vaw ta, pachu ta. **15** Zuzy ta, "He chysa heta a chu bei leipata kheita ma a thai tly?" tah ei ta. Ama noa kawh ta. **16** Zisu ta amo a chhy ta, "Ei bi pachupa he kei ei cha leipata, na tuatupa ei tlo a cha; **17** ahyrai ano khonazi a tao khopa chata bi pachupa he Khazopa papuapa ma, keima tao chhupa ma ei rei a pahno awh. **18** Ahyrai ano tao chhupa bi a reipa cha ano ronana a tluapa a cha; a tuatupa ronana a tluapa deikua cha, cha chysa cha chysa hmeiseipa a cha, ano liana chata a do leina rai y vei. **19** Mawsi ta rypa cha nama hnota cha pi vei ei ma? Chahrasala nama hry liata ahyhma ta rypa cha zy tlo ei chi va. Namu ta khazia thih eina chhua ei chi?" tah ta. **20** Zawpi chata, "Ahripa a zopa na cha he! Ahy ma thih cha chhua?" tah ei ta, a chhy ei ta. **21** Zisu chata a chhy ta ama hnota, "Hmo miakha ei taopa kha, namu zydua ta noapata nama y. **22** He vana heta Mawsi ta chopawtaina ky kha cha pi ei ta (Mawsi papuapa cha tlo leipata, pathlahtupazy papuapa tlo cha tlo ta),

pahano chhaota chysa chopaw nama tai ty. **23** Mawsi rypa parao lei nawpata pahano ta chhao chapaw ta chopaw a pataisa tlo khiata cha, kei ta pahano ta chysa ei patlapa vata ei cho liata nama pathi a ia hlei ma? **24** A lana hawta pachia kha ula, a siapata tlo paehu te u," tah ta.

He he Mesiah cha vei ma?

25 Zerusale khi liata chysa thokha ta, "He chysa he thih ama chhuapa cha cha vei ma? **26** Mo te u, a laha ta bi rei ta, a hnota, khapahma rei tlo ei va! Ano he Mesiah a cha tahpa hyutupazy ta ama pahno hmeisei va mai? **27** He chysa he a vaw puana pahno tlo pi ta, Mesiah deikua cha a vaw tlo tita cha a puana ahyhma ta pahno awh vei ei," tah ei ta. **28** Cha vana chata Zisu ta Khazopa achhynao liata a pachu nota aw ta, "Namo ta eina pahno ei chi na, ei puana chhao nama pahno na? Chahrasala keima rei ta a vypa cha va na; na tuatupa he hmeiseipa a cha, ano cha pahno tlo ei chi va. **29** Kei deikua chata ano cha ei pahno, ano tawta a vaw puapa cha na ta, ano cha na tuapa cha tlo ta," tah ta. **30** Chatanachata ano cha patu a chhua ei ta; chahrasala a daiti a tlo leipa vata ahyhma ta hria vei ei. **31** Zawpi thokha a hlupi deikua chata ano cha a ngiapa ei ta; "Mesiah cha a vaw tlo tita he chysa taopa hlata a hlu via hmonoapa a tao awh ma?" tah ei ta.

Molaipazy cha Zisu patu awhpata ama tua

32 Pharisaizy ta a cho liata zawpi paphoparuna kyzy cha thei ei ta, chatanachata theithaipa abeizy nata Pharisaizy ta patu awhpata hyutupazy tua ei ta. **33** Zisu ta, "Buakhata nama hnota y chy awh na ta, na tuatupa la ei si awh; **34** namo ta na tlua awh ei chi ta, na hmo awh vei ei chi; ei yna la chhao a vy thei awh vei ei chi," tah ta. **35** Zuzy chata amosasy ta, "Eima hmo thei lei nawpata he chysa he khataila a si awh? Krikazy hry liata a paipa sahlao hnota sipata Krikazy a pachu awh tlyma? **36** 'Namo ta na tlua awh ei chi ta, na hmo leipa awh ei chi ta, ei yna la chhao a vy thei awh vei ei chi,' a tahpa he, khapa a tahna ma a cha awh?" tah ei ta.

Hrona ti chava zy

37 Kychhi chhana no, no rona chaipa liana chata Zisu a dua ta aw ta, "Ahyrai a da a phi khiatala kei la a vy sala. **38** Ahyrai na ngiapapa cha do maw sy, Khazopa cha bi reipa hawta, "Ti hropa a chho tawta a vaw lo awh," tah ta. **39** Cha bizy cha ngiapatupazy ta Thlahpa ama hnei awhpa ky a reipa a cha; Thlahpa cha pipa cha ma vei, Zisu cha paronasapata a y ma leipa vata.

Vatla hry liata apachhaina

40 Zawpi hryta thokha ta cha bizy cha ama thei nata, "He he hrosopa cha a cha tlai hi," tah ei ta. **41** Thokha ta, "He he Mesiah cha a cha," tah ei ta. Thokha deikua chata, "Mesiah cha ma Kalili ra tawta a pua awh tly? **42** Mesiah cha Davi pathlahzy hry liata, Davi yna khi Bethlehe liata a pua awhpa a cha, tahpa Khazopa cha bi ta rei vei ma?" tah ei ta. **43** Chatanachata ano vata zawpi cha a pachhai ei ta. **44** Thokha chata patu kho ei ta, chahrasala ahyhma ta hria vei ei.

Bihneitupazy ngiapa leina

45 Hyutupazy cha theithaipa abeizy nata Pharisaizy hnota a vy hei ei ta, amo chata ama hnota, "Khazia nama vaw chhi vei?" vaw tah ei ta. **46** Hyutupazy chata, "Hao hawna hao ta chysa ta bi rei bei vei ei!" tahpata a chhy ei ta. **47** Pharisaizy chata ama hnota, "Namo chhao, dopata nama y ha hra ma? **48** Hyutupazy nata Pharisaizy hryta ano a ngiapapa ama y ha ma? **49** He rypazy a pahno leipa zawpizy he chhisapa ama cha mata," tahpata a chhy ei ta. **50** Nikadima, cha hlata Zisu lata a vypa cha. ama hryta a hlao hrapa cha ta, ama hnota, **51** "Ano pakah tlaita a bi theipa nata a hmotaopa pahno hlata eima rypa ta chysa thai lei a pachasa bei ma?" tah ta. **52** Amo chata a hnota, "Na chhao cha Kalili mo cha hra khia chi? Tlua la Kalili ra liana chata, hrosopa ahyhma a pua awhpa ama y leipa pahno cha chi," tahpata a chhy ei ta. **53** Chatawcha chysa to amo o chyu lataa di

hawh ei ta.

8

Chano sihrypa

1 Zisu deikua cha Oli Tia lata tlaos si ta. **2** My ta Khazopa achhynao liata a ngia hei ta, chysa zydua ano lata a vy ei ta; ano cha a tyu ta, amo pachu ta. **3** Rypa pachutupazy nata Pharisaizy ta chano pakha a pheihai nota ama patupa a vaw chhi ei ta, a lia liata paduasa ei ta. **4** Zisu hnota, "Pachutupa y, he chano he a pheihai nota patupa a cha, a pheihai no tlaita. **5** Rypa chabu liata Mawsi ta he hawpa chysa he alo ta vawsao awpha bi mania pi ta; nama ta kheita na pacha?" tah ei ta. **6** Cha bi cha ano pasia nawpata tao ei ta, ano leina awhpata ama hmo thei nawpata. Chatanachata Zisu a bo ta, a kudy ta alei liata ro ta. **7** Ama hiahri ngapa vata ano cha thyu ta ama hnota, "Nama hryta molei a hnei leipa maita ano cha alo ta vaw tua maw sy," tah ta. **8** Chatawcha a bo hei ta, a kudy ta alei liata ro hei ta. **9** Amo chata a bi reipa cha ama thei nata, macha chaipa tawta pua pathao ei ta, a chhana taita pakha pakha ta pua lyma ei ta; chatanachata Zisu deita y ha ta, chano a lia liata a yna ualua liata a ypa chhao khata. **10** Zisu thyu ta a hnota, "Chano, khataila ama y khai hawh, ahyma ta thai lei ama cha pachasa tia ma?" tah ta. **11** Ano chata, "Abeipa y, ahyma ta thai lei na pachasa vei ei," tah ta. Zisu ta, "Kei chhaota thai lei cha pachasa va na, si la, atahma tawta molei khao kha y," tah ta.

Zisu khizaw khaipa

12 Zisu ta ama hnota bi rei hei ta, "Kei, khizaw khaipa ei cha; ahysai na zipa cha a zona liata charei cheita leipa awh ta, hrona khaipa tlaos a hnei awh," tah ta. **13** Pharisaizy ta a hnota, "Nama bi a pahnosapa na cha, na bi pahnosapa a do vei," tah ei ta. **14** Zisu ta ama hnota, "Keima bi a pahnosapa awh sala ei bi pahnosapa a do, kei ta ei vaw puana nata ei sina awpha ei pahno na, namo la ei vaw puana nata ei sina awpha chhao pahno vei ei

chi. **15** Namu ta sahpa hawta nama sei ty, kei la ahyhma sei va na. **16** Sei hra awh sala, ei seina a do awh, keima deita cha leipa na ta, kei nata Paw na tuatupa tlo cha tlo pi ta. **17** Nama rypa chabu liata chhao, chysa pano bi a do tahpa ropa a cha hra mata; **18** kei he keima bi pahnosatupa ei cha, Paw na tuatupa chata ei bi a pahnosa hra," tah ta a chhy ta. **19** Amu chata a hnota, "Na Paw khatai liata a y?" tah ei ta. Zisu ta. "Namu ta kei na pahno vei ei chi, ei Paw chhao pahno vei ei chi; eina pahno khia ei chi ta la, ei Paw chhao nama pahno awh," tahpata a chhy ta. **20** Cha bizy cha Khazopa achhynao liata a pachu nota thyuna sona su liata rei ta; ahyhma ta ano patu vei ei, a daiti a tlo ma leipa vata.

Keima sina la si thei va ei chi

21 Ano chata ama hnota, "Ei si awh hi, namu ta na tlua awh ei chi ta, nama moleina hnei thla hapata nama thi awh; ei sina awhpa la a vy thei awh vei ei chi," tah hei ta. **22** Zuzy ta, " 'Ei sina awhpa la a vy thei awh vei ei chi,' a tahpa he, a thih awh tlyma?" tah ei ta. **23** Ano chata ama hnota, "Namu a ry lata a puapa nama cha, kei la a cho lata a puapa ei cha; namu he khizaw liata a puapa nama cha, kei la he khizaw liata a puapa he cha va na. **24** Chavata nama hnota namu moleina hnei thla hapata nama thi awh, ei tahpa kha, ano cha ei cha tahpa nama ngiapa vei khiatala, nama moleipa hnei thla hapata nama thi awh," tah ta. **25** Amu chata a hnota, "Ahyhma na cha?" tah ei ta. Zisu ta ama hnota, "A thaota tawta nama hnota ei rei typa kha. **26** Namu ky liana heta hmo hlupi rei awhpa nata pachia awhpa ei hnei; khaparai cha sala na tuatupa cha a dopa a cha, ano tawta bi ei theipa mai khizaw hnota ei chho hi," tah ta. **27** Paw thati ama hnota a rei tahpa pahno vei ei. **28** Chatanachata Zisu ta, "Namu ta Chysa Sawchapawpa he nama chalua tawta, ano cha ei cha tahpa nata kei ta kei rei ta hmo khapahma tao leipa na ta, Paw eina chhopa lyma hawta he bizy he tlo ei reipa a cha tahpa nama vaw pahno awh. **29** Na tuatupa cha ei hnota y ta; na pathlua vei, a hmo kho viapa mai ei tao typa vata," tah ta. **30** Cha bizy cha a rei hai nota chysa hlupi ta ano cha a ngiapa hawh ei ta.

Bi hmeiseipata kho ta palaisana

31 Zisu ta ngiapatupa Zuzy hnona chata, "Ei bi liata nama y thla ha khiatala, ei pachupazy nama cha hmeisei awh, **32** bi hmeiseipa pahno awh ei chi ta, bi hmeiseipa chata kho ta a cha palaisa awh ei," tah ta. **33** Amo chata a hnota, "Abaraha pathlahzy eima cha mata, atahma taita ahy sei ta hmata y bei ma pi, Kho ta a cha palaisa awh ei,' kheitazi ta a tahpa ma na cha?" tahpata a chhy ei ta. **34** Zisu ta ama hnota, "Hmeiseitata, hmeiseitata, ei cha chho ei chu, ahyrai hmo a paraopa mai moleina sei a cha. **35** Sei cha chhazaw ta o liata y thla ha vei; Sawchapawpa deikua cha chhazaw ta a y thla ha ty. **36** Sawchapawpa ta kho ta a cha palaisa khiatala, khotalaipa nama cha hmeisei awh. **37** Abaraha pathlahzy nama chapa ei pahno na; cha hra ula thih na chhua ei chi, ei bi ta nama palorupa liata yna a hnei leipa vata. **38** Kei ta ei Paw tawta hmo ei hmopa cha ei rei ty, namo chhaota nama Paw tawta hmo nama theipa cha tao ty ei chi ta," tah ta.

Nama paw cha ahripa

39 Amo chata a hnota, "Eima paw Abaraha a cha," tahpata a chhy ei ta. Zisu ta ama hnota, "Abaraha sawzy nama cha khiatala. Abaraha hmo nama tao awh, **40** chahrasala atahma thih na chhua tlo ei chi, Khazopa tawta bi hmeiseipa ei pahnopa cha chhotupa ei cha mata; Abaraha ta he hawna heta tah vei. **41** Namu deikua cha nama paw hmo cha nama tao ty," tah ta. Chatawcha amo chata a hnota, "Apheipata sapa cha ma pi; Paw pakha deita eima hnei, Khazopa tlai cha," tah ei ta. **42** Zisu ta ama hnota, "Khazopa nama Paw a cha khiatala ei ky eina pacha awh ei chi, Khazopa tawta a puapa nata ano tawta a vypa cha tlo na ta; keima rei ta a vypa cha va na, ano ta eina tuapa tlo a cha. **43** Khazia ei reizi nama pahno vei? Ei bi nama pahmo thei leipa vata. **44** Namu cha nama paw ahripa tawta a puapa cha ei chi ta, nama paw khopa nama tao kho. Ano cha a thao tawta lianycheipa a cha, bi hmeiseipa liata y vei, a chho liata bi hmeiseipa rai a y leipa vata. Haipa bi a a rei nata ano tao chhupa reipa a

cha ty, haiphiapa cha tlo ta, haipa paw chhao a cha. **45** Bi hmeiseipa ei reipa vata namo ta na ngiapa vei ei chi. **46** Nama hry liata ahyma moleina ky liata thai lei na pachasa thei awhpa a y? Bi hmeiseipa ei reipa a cha khiatala namo ta khazia eina ngiapa vei ei chi? **47** Khazopa tawta a puapa chata Khazopa bi a zy ty; he vana heta nama zy vei, Khazopa tawta a puapa nama cha leipa vata," tah ta.

Abaraha y hlata ei y thla hawh

48 Zuzy chata a hnota, "Samari chysa ahripa azopa na cha, eima tahpa kha pado kawh ma pi ma?" tah ei ta a chhy ei ta. **49** Zisu ta, "Ahripa azopa cha va na; ei Paw ei palyupalipa tlo a cha, namo ta ei mo nama pachhipa he. **50** Chahrasala keima palyupalina a tluapa cha va na, a tuatupa nata pachiatupa Pakha a y. **51** Hmeiseitata, hmeiseitata, ei cha chho ei chu, chysa ta ei bi a zy khiatala chhazaw ta thi hmia hmo awh vei," tah ta. **52** Zuzy ta a hnota, "Ahripa azopa na cha tahpa atahma eima pahno hawh. Abaraha a thi hawh, hrosopazy chhao; nama ta, 'Chysa ta ei bi a zy khiatala chhazaw ta thina padi awh vei,' tah tlo chi ta. **53** Eima pathlahtupa Abaraha hlata na rona via ma? Ano chhao a thi hawh! Hrosopazy chhao ama thi hawh! Ahy ta ma na rei?" tah ei ta. **54** Zisu ta, "Keima a palyupali awh sala, ei palyupalina khapata hma cha vei; eima Khazopa nama tahpa ei Paw cha na palyupalitupa a cha. **55** Namu ta ano pahno tlo ei chi va. Kei deikua chata ano ei pahno, ano pahno va na tah awh sala, namo hawta a haipa ei cha hra awh; kei deikua cha ano pahno na ta, a bi chhao ei ngia ty. **56** Nama pathlahtupa Abaraha kha ei no a hmo awhpa a chapa vata a thah a pha ngaita ty; chatawcha hmo tlaita a ly kawh ta," tah ta a chhy ta. **57** Zuzy chata a hnota, "Na ko syngaw chhao a cha leipa chi, Abaraha na hmo ma?" tah ei ta. **58** Zisu ta ama hnota, "Hmeiseitata, hmeiseitata, ei cha chho ei chu, Abaraha y hia chhaota ei y," tah ta. **59** Chatanachata a vaw nawpata alo a hua ei ta; chahrasala Zisu a nyu ta, Khazopa achhynao tawtapa cha pua ha ta.

Mochaopa ta a pipa Zisu ta a patla

1 Zisu ta a si pakho hai nota, a pi no tawta mochaopa pakha hmo ta. **2** A pachupazy ta a hnota, "Rabai, mochao chipata a pipa he ahyma moleina a tao, he chysa he ma, a no nata a paw maw?" tah ei ta, hiahri ei ta. **3** Zisu ta, "He chysa heta moleina tao hra vei, a no nata a paw ta moleina tao hra vei ei, Khazopa raihria a cho liata a lana awhpa tlaa a cha. **4** Nochho a cha nota na tuatupa rai eima hria awhpa a cha; za a cha daima ha hi, cha tina chata ahyma ta raihria thei khao awh vei ei. **5** Khizaw liata ei y chhota khizaw khaipa ei cha," tah ta a chhy ta. **6** Cha hawta a rei khai nata alei liata a pachi pachhao ta, pachi chata beilei tao ta, beilei cha a mo liata hnia ta, **7** a hnota, "Siloam tipo liata va pasi te," tah ta. (Siloam cha 'Tua' tagna a cha). Chatawcha vaw ta pasi ta, mo pavapata a vaw di ha ta. **8** A vaizy nata cha hlata a kudaopa a hmo typazy ta. "He chysa he atyu hmata ku a dao typa kha cha vei ma?" tah ei ta. **9** Mo hropa ta, "Ano kha a cha he," tah ei ta; mo hropa ta, "Cha vei, ano a lyupa na tlaa a cha," tah ei ta. Ano chata, "Kha chysa kha na ei cha," tah ta. **10** Amo chata a hnota, "Na mo kheita e a vaw pava?" tah ei ta. **11** Ano chata, "Zisu ama tahpa khata beilei tao ta, ei mo liata hnia ta, 'Siloam tipo la vaw la, pasi te,' na tah ta; chatanachata vaw na ta, pasi na ta, mo pavana ei hmo hawh," tah ta. **12** Amo chata a hnota, "Ano cha khatai liata a y?" tah ei ta. "Pahno va na," tah ta.

Tlana ky Pharisaizy ta ama pasiana

13 Cha hlata mochaopa cha Pharisaizy lata a chhi ei ta. **14** Zisu ta beilei tao ta, a mo a pava no kha pahano cha ta. **15** Chatanachata Pharisaizy la a mo a vaw pava hanazi hiahri hei ei ta. Ano chata ama hnota, "Ei mo liata beilei bai ta, pasi na ta, ei hmo thei hawh," tah ta. **16** Pharisai thokha ta, "Cha chysa cha pahano a o leipa vata Khazopa tawta a puapa cha awh vei," tah ei ta. Thokha deikua chata, "Moleipa ta kheita e he hawta hmonoapa a tao thei awh?" tah ei ta. Chatawcha a pachhai ei ta. **17** Chatawcha mochaopa hnona chata, "Na mo a pavapa kha, nama ta khei

hawta e ano cha na pacha?" tah hei ei ta. Ano chata, "Hrosopa a cha," tah ta. **18** Chahrasala Zuzy ta a mo a pavapa no nata paw cha ama aw hia lei cha, mochaopa chata a mo a pava hawhpa ky cha zo leipa ei ta, **19** a no nata a paw hnota, "He chysa he nama sawchapawpa mochao chipata a pipa nama tahpa kha a cha ma? Kheita e atahma a hmo hei thei hawh?" tahpata hiahri ei ta. **20** A no nata paw chata, "He he eima sawchapawpa a cha tahpa eima pahno, mochao chipata a pipa chhao eima pahno; **21** chahrasala kheita ma atahma he a hmo thei hawh tahpa pahno ma pi, a mo pavasatupa chhao pahno hra ma pi. Ano hiahri te u; paw tlopa a cha mata, ano ky cha ano ta rei la va," tah ei ta a chhy ei ta. **22** Zuzy ama chipa vata a no nata a paw chata cha bizy cha ama rei, Zuzy ta cha hia chhaota, ahyrai ta ano cha Mesiah a cha tahpata a chakhei khiatala apakhynao patosa lei awhpa a ry tah chy tlo ei ta. **23** Cha vana chata a no nata a paw chata, "Paw tlopa a cha mata, ano hiahri te u," ama tah. **24** Chatanachata mochaopa cha ei no lata aw ei ta, a hnota, "Khazopa reithai te; kha chysa kha la moleipa a cha tahpa eima pahno na," tah ei ta. **25** Ano chata, "Moleipa a cha ma a cha vei, pahno va na; ky kha ei pahno, kha hlana khata ei mo chao ta, atahma ei hmo thei hawh," tah ta a chhy ta. **26** Amo chata a hnota, "Na cho liata kheita a tao? Na mo kheita e a pavasa?" tah ei ta. **27** Ano chata ama hnota, "A thiapaw kha ei cha chho ha ei kha, nathli kho tlo ei chi va. Khazia nama thei kho hei? Namu chhao a pachupazy cha hra awhpa nama kho ma?" tahpata a chhy ta. **28** Amo chata rah ei ta, "Nama he ano pachupa cha chi ta, keimo la Mawsi pachupazy eima cha. **29** Khazopa ta Mawsi bi a chho tahpa eima pahno, he baohra he khatai tawta a puapa ma a cha pahno ma pi," tah ei ta. **30** Cha chysa chata ama hnota, "Cha tlai cha noa a chhina cha a cha! Khataila tawta a puapa ma a chapa pahno leipa ei chi ta, ei mo a pavasa tlopa hi. **31** Khazopa ta moleipa bi a nathli ty leipa eima pahno, chahrasala ahyrai ta Khazopa a chhy ta a khopa a taopa chata Khazopa ta ano cha a nathli ty. **32** Khizaw y tua no tawta ahyhma ta mochao chipata a pipa mo ama pavasa heipa thei bei vei ei. **33** He chysa he Khazopa tawta a puapa a cha vei khiatala, khapahma tao thei aw h vei," tah ta a chhy ta. **34** Amo chata a hnota, "Na, moleipa ta a pipa na cha mata, nama ta mania na

pachu baohra ma?" tah ei ta a chhy ei ta. Chatanachata ano cha papua hawh ei ta.

Thlahpa mochaona

35 Ano ama papua hawhpa Zisu ta thei ta, tluapata hmo ta, "Khazopa Sawchapawpa na ngiapa ma?" tah ta. **36** Ano chata, "Papu y, ano cha ahy maw, ei ngiapa thei nawpata," tah ta a chhy ta. **37** Zisu ta a hnota, "Ano cha na hmo thla ha mata, bi cha chho haipa he a cha," tah ta. **38** Ano chata, "Abeipa, ei ngiapa na," tah ta a nao ta. **39** Zisu ta, "Pachia awhpata he khizaw liana heta a vypa ei cha, hmo thei leipazy cha ama hmo theina awhpa nata a hmo theipazy cha ama mo a vaw chaona awhpata," tah ta. **40** A kiapa ta Pharisai a ypazy chata, cha bizy cha ama thei nata a hnota, "Keimo chhao he mochaopa cha hra khia pi?" tah ei ta. **41** Zisu ta ama hnota, "Mochaopa nama cha khiatala moleina hnei awh vei ei chi; chahrasala, 'Eima hmo thei na,' atahma a tah tlo ei chi ta, chavata nama moleina a y thla hawh.

10

Mitakupa sado pakhona

1 Hmeiseitata, hmeiseitata, ei cha chho ei chu, ahyrai mitakupa sado liata ochhi lata a ngia leipata, a hro lata kia ta a ngiapa cha, cha chysa cha paruhmapa nata phihmapa a cha; **2** ahyrai ochhi lata a ngiapa deikua cha mitakupazy mitakuvaitupa a cha. **3** Ochhivaitupa ta ano cha vaw pahy pa ty ta; mitakupazy ta a ao thei ty ei ta, ano mitakupazy cha ama mo ta aw chy ta, chhitha ty ta. **4** Ano ei zydua a papua khai patanata ama hmialata si ta, mitakupazy chata ano zi ty ei ta, a ao pahno tlo ei ta. **5** Mo hropa zi leipa awh ei ta, tlaao ama rasai awh, mo hropazy ao cha ama pahno leipa vata," tah ta. **6** Cha pakhona bi cha Zisu ta ama hnota rei ta, chahrasala khapa bi ma ama hnota a rei tahpa pahno tlo ei va.

Zisu mitakuvaitu phapa

7 Chatanachata Zisu ta ama hnota rei hei ta, "Hmeiseitata, hmeiseitata, ei cha chho ei chu, kei he mitakupa ochhi cha ei cha. **8** Ei hmialata a vypa zydua kha paruhmapazy, phihmapazy cha khai ei ta; chahrasala mitakupazy chata ama bi zo vei ei. **9** Kei ochhi cha ei cha; ahyrai keima liata a ngiapa chata pabopata y awh ta, a ngia awh ta, pua awh ta, nipa a hmo hra awh. **10** Paruhmapa cha paru awhpa nata thih awhpa nata parao awhpa leipata cha a vy vei; kei la hro ama hnei nawpata a kipata ama hnei nawpata a vypa ei cha. **11** Kei mitakuvaitupa phapa ei cha. Mitakuvaitupa phapa ta mitakupazy chata a hro a pi. **12** A hlaopa mitakuvaitupa hmeisei leipata, mitakupazy ano ei a cha leipa vata, changi a vypa a hmo nata mitakupazy a rasai ty; changi chata mitakupazy sihnao ta a papai ty. **13** A hlaopa chata mitakupazy a papeisa leipa vata a rasai ty. **14** Kei la mitakuvaitupa phapa ei cha; Paw ta eina pahnopa nata kei ta Paw ei pahnopa hawna heta **15** keima ei pahno na ta, keima ei chhaota eina pahno; mitakupazy chata ei hro ei pi. **16** He mitakupa sado liatapa leipa he, mitakupa hropa ei hnei; amo chhao ei vaw chhi awhpa a cha, ei ao chhao ama thei awh. Chatanachata hlao khata y awh ei ta, a vaitupa pakha nata. **17** He vana heta Paw ta ky eina pacha, lah hei awhpata ei hro ei pipa vana heta. **18** Ahyhma ta na lah pa awh vei ei, keima rei ta tlo ei pi awh. A pi theipa ei cha, a lah hei theipa chhao ei cha; he bipipa he ei Paw tawta ei hmo," tah ta. **19** Cha bazy vana chata Zuzy a pachhai hei ei ta. **20** Thokha a hlupi ta, "Ahripa azo ta, a hru ha hi; khazia a bi nama nathli?" tah ei ta. **21** Thokha ta, "He bazy he ahripa azopa bi reipa cha vei. Ahripa ta mochaopa mo a pavasa thei ma?" tah ei ta.

Zunaw ta Zisu ama kho leina

22 Zerusale khi liata Ahlana kychhi no cha ta; **23** cha cha chasi paw no a cha, Zisu Khazopa achhyna-o liata Sawlawmaw aika liata a khikha ta. **24** Zuzy a kiapa liata a vy ei ta, a hnota, "Khacha e noraipata mania na tao awh? Mesiah na cha khiatala a siapata mania chho te," tah ei ta. **25** Zisu ta ama hnota, "Ei cha chho hawh ei kha, zo tlo ei chi va. Ei Paw mo ta hmo ei taopa he, hezy heta ei thati a pahnosa; **26** chahrasala zo tlo ei chi va, ei

mitakupa hry liatapa nama cha leipa vata. **27** Ei mitakupazy ta ei ao ama thei ty, kei chhaota amo ei pahno, amo chata eina zi ty ei; **28** ama hnota chhazaw hrona ei pi, chhazaw ta leidia leipa awh ei ta, ahyhma ta ei ku tawtapa na chhu hra awh vei ei. **29** Amo na pitupa ei Paw cha chysa zydua hlata rona chaipa cha ta, ahyhma ta Paw ku tawtapa cha chhu thei awh vei ei. **30** Keima nata Paw cha pokha eima," tahpata a chhy ta. **31** Zuzy chata a vaw nawpata alo a hua hei ei ta. **32** Zisu ta amo cha chho ta, "Paw tawta a puapa raihria phapa hlupi cha pamosa ei na ta; kha raihriazy hry liana khata raihria kheihawpa vana khata ma alo ta eina vaw awhpa ei chi he?" tah ta. **33** Zuzy chata a hnota, "Raihria phapa chota alo ta eima cha vaw lei awhpa he; Khazopa na reipachhina chota nata na chysapa cha tlo chi ta, Khazopa ta na taopa vana heta a cha," tahpata a chhy ei ta. **34** Zisu ta ama hnota, "Nama rypa chabu liata, 'Khazozy nama cha, ei tah,' tahpa ropa cha vei ma? **35** Khazopa bi tlonazy hmata khozozy ama tah khiata cha, Khazopa cha bi pathlei theipa cha leipata, **36** Paw ta rao ta, khizaw liata a tuapa cho liana heta, 'Khazopa Sawchapawpa ei cha,' ei tahpa vata, 'Khazopa na reipachhi eina tah ei chi ma'? **37** Ei Paw raihria a hriapa ei cha vei khiatala na ngiapa kha u; **38** anodeikuacha a hriapa ei cha khiatala, kei na ngiapa vei hra ula, raihriazy chha he a ngiapa te u. Paw keima liata a ypa nata kei Paw liata ei ypa pahnopata nama ngiapa nawpata," tah ta a chhy ta. **39** Chatanachata ano cha patu a chhua hei ei ta, chahrasala amo ku tawtapa pua ha ta. **40** Zawda chava haosa liata Zawhana ta cha hlata chysa a batina lana khata si ha hei ta, cha liana chata y thla ha ta. **41** Chatawcha chysa hlupi ano la a vy ei ta; "Zawhana ta hmonoapa khapahma tao leipata, chahrasala Zawhana ta he chysa thati a reipa mai kha a do kawh na," tah ei ta. **42** Cha liana chata chysa hlupi ta ano a ngiapa hawh ei ta.

11

Lazara thina

1 Chysa pakha, Mari nata a naronno Martha yna khi Bethani liata, Lazara

tia leipata y ta, **2** Mari sathaw ropahapa Abeipa hnia ta a sa ta a pheia a hrutupa kha, kha rilapa Lazara a cha, a tia leipa cha. **3** A sitanozy ta Zisu hnota, "Abeipa, na kypachapa kha tia vei," tahpata chysa tua ei ta. **4** Zisu ta cha cha a thei nata, "He pasana he thina awmpa cha vei. Khazopa ronana chata tiao a cha, Khazopa Sawchapawpa cha he vana heta a rona nawpa a cha," tah ta. **5** Zisu ta Martha zy, a naronno zy, Lazara zy ky pacha ta. **6** Lazara tlaleipa thati a thei nata a yna liata no no y ta. **7** Cha khai tawna chata a pachupazy hnota, "Zudia ra lata si hei su u," tah ta. **8** Pachupazy chata a hnota, "Rabai, a tlia na khata Zuzy ta alo ta vaw ama cha chhuapa kha, cha lana chata na si hei awmpa ma?" tah ei ta. **9** Zisu ta, "Nochho ta daw hrawhleino y vei ma? Chysa nochho ta a charei khiatala a chapia bei vei, he khizaw khaipa he a hmopa vata. **10** Anodeikuacha chysa za ta a charei khiatala a chapia ty, ano liata khaina a y leipa vata," tah ta a chhy ta. **11** Cha bizy cha rei ta, cha tawna chata ama hnota, "Eima viasa Lazara cha a mo ha ta, a mopa pahrah awmpata ei si awmpa," tah ta. **12** Pachupazy chata a hnota, "Abeipa, a mo hawh khiatala a tia hei awmpa," tah ei ta. **13** Zisu ta athipa ky a reipa cha ta, chahrasala amo chata a paha chhota a mopa ky a reipa khia ma, tahpa pacha ei ta. **14** Chatanachata Zisu ta a siapata ama hnota rei ta, "Lazara a thi hawh; **15** cha liata ei y leipa cha ei cha lykhei ei, nama ngiapa thei nawmpata. Chahrasala ano la vaw ei su u," tah ta. **16** Thawma, Maphi ama tahpa chata a pachupazy hnota, "A thina liata thi hra awmpata si ei su u," tah ta.

Zisu thyuheina nata hrona

17 Zisu ta a tlo nata Lazara cha no pali thla liata a y hawh tahpa pahno ta. **18** Bethani khi cha Zerusale khi kiapa cha ta, me no daima a hlapa a cha. **19** Chatanachata ama rilapa thipa vata thlahpalo awmpata Zuzy hlupi Martha nata Mari lata a vy ei ta. **20** Martha chata Zisu a vy awmpa tahpa a thei patanata kei dy ta, Mari deikua cha o liata a tyu thla ha ta. **21** Martha chata Zisu hnota, "Abeipa y, he liata a ypa cha la ei rilapa a thi lei awmpa tlai. **22** Atahma chhao Khazopa lata na hawmpa mai, Khazopa ta a cha pi awmpa tahpa ei pahno na," tah ta. **23** Zisu ta a hnota, "Na rilapa a thyu hei

awh," tah ta. **24** Martha chata a hnota, "No ki nota thyuheina liana chata a thyu hei awh tahpa ei pahno na," tah ta. **25** Zisu ta a hnota, "Kei he thyuheina nata hrona cha ei cha; ahyrai na ngiapapa cha, thi hrasala a hro thla ha awh,**26** ahro pa maita na ngiapapa cha chhazaw ta thi awh vei. Cha bi cha na ngiapa ma?" tah ta. **27** Ano chata a hnota, "Abeipa y, Mesiah Khazopa Sawchapawpa khizaw liata a vy awhpa cha na cha tahpa ei ngiapa na," tah ta.

Zisu chahna

28 Cha bi cha a rei khai patanata si ta, a naronno Mari cha a rulata aw ta, "Pachutupa he liata y ta a cha aw," tah ta. **29** Ano chata cha cha a thei patanata thyu parah ta, ano la vaw ta.**30** Zisu cha khi liata a ngia leipata, Martha ta a kei dy nota a yna ualua liata y ta. **31** O chho liata thlah a palotupa a ylapa Zuzy chata Mari thyu parah ta a puapa ama hmo patanata, thla la chah awhpata vaw khia ma, tahpata zi ei ta. **32** Mari chata Zisu yna kei tlo ta, a hmo patanata a pheii thaby liata a khu lata pao ta a hnota, "Abeipa y, he liata a ypa cha la, ei rilapa a thi lei awhpa tlai," tah ta. **33** Zisu ta Mari chahpa nata a vaw zipa Zuzy chahpa cha hmo ta, a palorupa ta a ro ta, a pacharo ta; **34** "Ano cha khatai liata nama pazia?" tah ta. Amo chata a hnota, "Abeipa, a vy la, mo tua," tah ei ta. **35** Zisu chah ta. **36** Zuzy chata, "Mo te u, Lazara he a ky a pacha kawh dia!" tah ei ta. **37** Chahrasala thokha chata, "He chysa mochaopa mo a pavasatupa heta he chysa chhao he thi leipata paysa thei vei tlyma?" tah ei ta.

Lazara hro heina

38 Zisu cha a palorupa ta a ro hei ta, thla tlo ta; cha thla cha lopu cha ta, a pakah liana chata alo ta pamai pa a cha. **39** Zisu ta, "Alo he pasi te u," tah ta. A thipa sitano Martha chata a hnota, "Abeipa, atahma la a thu ha ba awh, a thina no pali cha ha tlo ta," tah ta. **40** Zisu ta a hnota, "Na ngiapa khiatala Khazopa ronanzazi na hmo awh, cha tah va na ma?" tah ta. **41** Chatanachata alo cha pasi ei ta. Zisu ava la ua ta, "Ei Paw y, ei bi na thei

typa vata na cho liata ei ly kawh na. **42** Chhazaw ta ei bi na thei ty tahpa ei pahno thla hawh, chahrasala zawpi aduapazy vata cha cha ei tah, nama ta eina tua chi tahpa ama ngiapa thei nawpata," tah ta. **43** Cha hawta a rei khai patanata ao paro ngaitapata," Lazara vaw pua te," tahpata aw ta. **44** Athipa cha a ku a phei ritopa pahlyna chota a vaw pua hawh, a hmia chhao ahruna po ta pahlypa cha ta. Zisu ta ama hnota, "Pathla ula, pasisa te u," tah ta.

Zisu ama leina

45 Cha vana chata Mari thlahpalotupa Zisu hmotaopa a hmopa Zuzy chata a hlupi ta Zisu ama ngiapa hawh; **46** chahrasala thokhazy cha Pharisaizy hnota vaw ei ta, ama hnota Zisu hmotaopazy cha chho ei ta. **47** Chatanachata theithaipa abeizy nata Pharisaizy chata ryureitupa sahlao awpakhy ei ta, "Kheita e eima tao awh? He chysa heta noa pa hlupi tao tlo ta. **48** He hawta eima pathli thla ha khiata cha chysa zydua ta ano a ngiapa awh ei ta, chatawcha Rawma chysazy a vy awh ei ta, eima su pathaipa nata eima chizy he mania ama lah pa awh," tah ei ta. **49** Ama hryta chysa pakha Kaiapha, cha ko liana chata Theithai Beichaipa cha ta, ama hnota, "Namo ta khapahmata pahno vei ei chi; **50** eima chi zydua a leidia lei nawpata chysa zydua vyupata chysa pakha thi nama chata a ngia tahpa pacha hra vei ei chi," tah ta. **51** Cha bi cha ano tao chhypata rei vei, cha ko liana chata Theithai Beichaipa cha ta, ama chizy vyupata Zisu a thi awhpa a rei chhilina tlao a cha, **52** cha chizy vyupa deitata cha vei, Khazopa sawzy khizaw liata a pai patlahpa zydua hlao khata a chhi pakhyina awhpa chhaota a cha hra. **53** Chatanachata cha no rakha tawna chata ano thih awhpata a pachia ty ei ta. **54** Chavata Zisu cha Zuzy hry liata a lahapata charei hei khao leipata, cha tawtapa cha rapathopa dai lata khi miakha, Ephrai ama tahpa lana chata si ha ta; cha liana chata pachupazy chhaota y thla ha ei ta. **55** Zuzy Zawpakho kychhi cha a hnia ha ta; chysa hlupi a pathaisa awhpata lyurapa tawta Zawpakho kychhi hlata Zerusale khi liata a vy ei ta. **56** Zisu tlua ei ta, Khazopa achhynao liata a dua hmata a chho ei ta, "Khapa e nama pangiasa? Kychhina liata a

vy awh vei ma?" a tah ei ta. **57** Theithaipa beizy nata Pharisaizy ta ano cha ama patu thei nawpata, ahyrai ta a yna ama pahno khiatala ama phua awhpa a cha, tahpa bi pi hawh tlo ei ta.

12

Bethani liata Zisu sathaw thuna

1 Zawpakho kychhina awhpa no charu byu ta, Zisu ta athipa hry tawta a pathyupa Lazara yna, Bethani khi cha vaw tlo ta. **2** Cha liana chata ano chata kychhina tao ei ta; Martha ta chakao ta, Lazara deikua cha a pati dolatupa pakha cha ta. **3** Mari ta khopathliana khophi spina thaw ropaha ngai tapa vaw chei ta. Zisu phei liata hnia ta, a sa ta a pheizy cha hru ta, cha thaw ro pahapa chata o cha bi ha ta. **4** Chahrasala Zuda Iskari a pachupa pakha, a patusatu awhpa chata, **5** "He sathaw ropahapa he taka za tho ta zuapata chysa dychhipazy hnota tlo ama pi vei?" tah ta. **6** Chysa dychhipazy a pachapa vata cha bi cha a reipa cha leipata, a parupa cha ta, taka sahria a vao ta, a chho liata sopazy cha a lah typa vata tlo a cha. **7** Zisu ta, "Ei na pabuna no chata a khai se. **8** Chysa dychhipazy cha chhazaw ta nama hnota a ypa cha vei ei ma? Kei deikua cha chhazaw ta nama hnota a y awhpa cha va na," tah ta.

Lazara ama leina

9 Zisu cha liana chata a y tahpa Zu zawpizy ta ama vaw pahno nata, a vy ei ta, Zisu deita ama vy chhana cha leipata athipa hry tawta a pathyupa Lazara chhao kha, hmo ama kho pa hra. **10** Chatawcha theithaipa abeizy cha Lazara chhao thih hra awhpata a parao ei ta, nano vata Zuzy a hlupi ta puasai ei ta, Zisu ama ngiapapa vata.

Zerusale ronapata a ngiana

12 A mylapa chata kychhina liata a vya zawpi hlupi ta, Zisu Zerusale khi liata a vy awh tahpa thei ei ta. **13** Thiahra kuazy a cheipata dy awhpata

pua ei ta, "Haozana! Abeipa mo ta Izarel Beipa a vypa cha reithaipata y se!" tahpata aw ei ta. **14** Zisu ta ala tawh hmo ta, a cho liata kia ta; **15** "Chi kha y, Zaio sawchanono y; mo te, na Beipa cha ala tawh cho liata kiapata a vy awh na!" tahpata ropa hawna khata. **16** Chazy cha hmialata a pachupazy ta pahno vei ei; chahrasala Zisu paronasapata a y tawna khata a thati liata cha bizy cha ropa a cha tahpa nata a cho liata cha hmozy cha ama vaw tao tlai tahpa thei hawh ei ta. **17** Lazara thla tawta a awpa athipa hry tawta a pathyu nota a hnota zawpi a ypazy khata a bi cha pahnosalya ei ta. **18** Cha vana chata zawpizy chhao chata ano cha kei dy ei ta. Cha hmonoapa cha a taotahpa pahno tlo ei ta. **19** Pharisaizy chata, "Pahno te u, khapahma nama tao thei vei hi; mo te u, khizaw ta ano ama zi hawh hi," tah ei ta.

[Krika chysa thokha ta Zisu ama thua](#)

20 Chatawcha kychhina liata Khazopa achhy awhpata a khypazy hryta Krika mo ahyzy tlyma y ei ta. **21** Chazy cha Kalili ra liata Besaida khipa Phili la a vy ei ta, a hnota, "Papu, Zisu eima hmo kho," tah ei ta a haw ei ta. **22** Phili chata Adru vaw chho ta; Adru nata Phili chata Zisu vaw chho ei ta. **23** Zisu ta a chhy ta ama hnota, "Chysa Sawchapawpa paronasapata a yna daiti a tlo hawh. **24** Hmeiseitata, hmeiseitata, ei cha chho ei chu, sa hmo alei liata tlah leipata a thi leipa khiata cha miakha deitata a y thla haty; a thi khiata deikua cha a hlupi a pathei ty. **25** Ahyrai a hro a tlaichhaipa chata a pahlei ty, ahyrai he khizaw liana heta a hrona a panawpa chata chhazaw ta hrona awhpata a vao thla ha awh. **26** Ahyrai ta eina chakao khiatala na zi tlai maw sy; ei yna liata na chakaotupa ta a y awh; ahyrai ta eina chakao khiatala ano cha Paw ta a palyupali awh.

[Chysa Sawchapawpa cha chaluapa a cha awh](#)

27 "Atahma ei palorupa no a po. Kheita ei tah awh? 'Ei Paw y, he daiti liana heta na pachhah te,' ei tah awh ma? Cha vei, khaparai cha sala heta cha awhpata heta he daiti taina heta ei y chhapa a cha. **28** Ei Paw y, na mo

palyupali te", tah ta. Chatanachata ava tawta ao vaw pua ta, "Ei palyupali hawh, ei palyupali hei awh," tah ta. **29** Zawpi a kiapa ta aduapazy chata cha cha thei ei ta, tokalopa na a thua, tah eita, Mo hropazy ta, "Valyuchapa ta ano bi a chho," tah ei ta. **30** Zisu ta a chhy ta, "Cha ao cha kei chata a puapa cha vei, namo chata tlo a cha. **31** Atahma he khizaw he pachiapa a cha, atahma he khizaw abei he thypa a cha awh; **32** chatawcha kei, alei tawta chaluapata ei y khiatala, chysa zydua kei lata ei sy awh," tah ta. **33** Cha bi cha a thinazi awhpa pahnosa nawpata a rei. **34** Zawpi chata a hnota, "Mesiah cha chhazaw ta a y awh tahpa, rypa chabu liata eima pahno. Nama ta Chysa Sawchapawpa chaluapata a y awhpa a cha, kheitazi ta a tahpa ma na cha? Cha Chysa Sawchapawpa cha ahyma a cha?" tah ei ta a chhy ei ta. **35** Zisu ta ama hnota, "Khaipa buakhata nama hry ta a y chy. Khaipa nama hnei chhona heta charei te u, zona ta a cha pachhai lei nawpata; ahyrai zona liata a chareipa chata a sina chy pahno ty vei. **36** Khaipa nama hnei chhota, khaipa he ngiapa te u, khaipa sawzy nama cha thei nawpata," tah ta.

Zunaw ngiapa leina

Cha bizeny cha Zisu ta rei ta, si ta, ama hmo lei nawpata a nyu ha ta. **37** Ama hmiako liata cha hawpa hmonoapa hlupi tao hrasala ano a ngiapa vei ei; **38** "Abeipa, eima bi reipa ahyma a ngiapa, Abeipa ku chhao ahy hnota ma a lua?" tahpa hrosopa Isai bi reipa kha a tlo nawpata. **39** He vana heta ama ngiapa thei vei, Isai ta, **40** "Ano ta ama mo pachao ta, ama pathipalo pahru ta, chata leipata la ama mo ta hmo pathlei awh ei ta, ama pathipalo ta pahno pathlei awh ei ta, chatawcha a hei pathlei awh ei ta, kei ta amo ei patla pathlei awh na," tahpa a rei heipa vana heta. **41** Isai ta a ronazi a hmopa nata a thati a reipa vata cha bizeny cha a rei. **42** Chahrasala hyutupazy thokha a hlupi ta Zisu a ngiapa ei ta; anodeikuacha Pharisaizy vata a phua vei ei, chata leipata cha a pakhyana-o tawta topata ama y awh: **43** Khazopa lata ronana hlata cha, chysa lata ronana kho via tlo ei ta.

Zisu kypachana

44 Zisu aw ta, "Ahyrai na ngiapapa cha kei na ngiapapa cha vei, na tuatupa a ngiapapa tiao a cha. **45** Ahyrai na hmopa cha na tuatupa a hmopa a cha. **46** Khizaw khaitupata a vupa ei cha, ahyrai na ngiapapa mai zona liata a y lei nawpata, **47** ahyrai ei bi reipa theipata a ngia vei hrasala keima ta pachia va na; khizaw pachia awhpata a vupa cha leipa na ta, khizaw pachhah awhpata a vupa cha tlo na ta. **48** Ahyrai na kho leipata ei bi reipazy a ngia leipa chata, pachiatupa pakha a hnei, ei bi reipa kha, kha bi tlai khata no ki no liana chata ano cha a pachia awh. **49** Keima tao chhupa ta rei va na; Paw na tuatupa chata ei rei awhpata ei chho awhpata he bi tiao eina pi. **50** Ano bipipa cha chhazaw hrona a cha tahpa ei pahno. Cha vana chata bi ei reipa he, Paw eina chhopa lyma hawta ei rei," tah ta.

13

Pachupazy phei Zisu ta a pasina

1 Zawpakho kychhi hlata, Zisu ta he khizaw he puasaipata Paw la a si daiti a tlo hawh tahpa pahno ta, ano chysa khizaw liata a ypa ky a pacha typazy cha, a chhana tai chhaota ama ky pacha ta. **2** Chatawcha zapati ni nota, cha hia chhaota ahripa ta Saimaw sawchapawpa Zuda Iskari cha Zisu patusa awhpata a palorupa ta pachasa ta. **3** Zisu ta Paw ta a ku liata hmo to a pavaosapa zy, Khazopa tawta a vaw puapa a chapa zy, Khazopa lata a si hei awhpata zy pahno thla hana chota, **4** zapati a dopa cha thyu ta, a pozy so ta, ahruna po lah ta, a sai ta. **5** Chatawcha raho liata ti patlai ta, pachupazy phei pasi pathao ta, ahruna po a saipa chata hru lyma ta. **6** Saimaw Pity la a vy ta; ano chata, "Abeipa, na ngasa ta ei phei na pasi awh ma?" tah ta. **7** Zisu ta a hnota, "Ei hmotaopa he atahma pahno va chi, chahrasala no hro na pahno awh," tah ta a chhy ta. **8** Pity ta a hnota, "Ei phei pasi chacheita awh va chi," tah ta. Zisu ta a hnota, "Ei cha pasi vei khiatala, kei liata khapahma topa hnei awh va chi," tah ta. **9** Saimaw Pity ta a hnota, "Abeipa, chata a cha khiatala ei phei dei cha leipata, ei ku nata ei lu chhao sy!" tah ta. **10** Zisu ta a hnota, "Ngaisi chipa cha phei leipata cha pasi byu vei, a pathai thla ha mata; namo nama pathai na, nama zydua

ta deikua cha vei," tah ta. **11** A patusatu awhpa cha pahno tlo ta; cha vata, "Nama zydua ta pathai vei ei chi," a tah. **12** Zisu ta ama pheii pasi khai tawta, a pozy lah ta, a thyu hei nata ama hnota, "Nama cho liata ei hmotaopa he khapa tahna ma a cha nama pahno ma? **13** Namota Pachutupa nata Abeipa eina tah ty ei chi; nama reipa a do na, cha tlai na ta. **14** Kei, nama Beipa nata Pachutupa hmata nama pheii ei pasi khiatala, namo chhaota nama pheii nama pasi pa awhpa a cha. **15** Nama chota ei taopa hawna heta, namo chhaota nama tao hra nawpata ei cha pamosapa cha tlo ta. **16** Hmeiseitata, hmeiseitata, ei cha chho ei chu, sei a zibeipa hlata lai via vei; lyuchapa chhao a tuatupa hlata lai via hra vei. **17** Cha hmozy cha nama pahno khiatala, tao ula nama nohlao awh. **18** Nama zydua ky rei va na; ei tlypazy cha ei pahno; chahrasala cha cha, 'Ei viachha a nitupata a pheii chakopa ei chota a hy,' tahpa, Khazopa cha bi kha a vaw tlo thei nawpata. **19** Atahma tawta a vaw tlo hlata, ei cha chho ei hi, a vaw tlo tita keima ano ei cha tahpa nama ngiapa thei nawpata. **20** Hmeiseitata, hmeiseitata, ei cha chho ei chu, ahyrai ei tuapa mai alypa cha, keima na lypa a cha, ahyrai kei na lypa cha na tuatupa alypa a cha," tah ta.

Zisu ta ano patusana a chhochhilina

21 Zisu ta cha hawta a rei khai nata, a palorupa ta a nopo ta, "Hmeiseitata, hmeiseitata, ei cha chho ei chu, nama hryta mo pakha ta eina patusa awh," tahpata pahnosa ta. **22** Pachupazy chata pahno leipa ei ta, amosasy ta a mo ei ta; **23** pachupazy hryta pakha Zisu ta a ky a pachapa cha tlakhai ka lata Zisu kiapa liata a hnipata y ta. **24** Saimaw Pity ta cha hnona chata, "Ahy ky ma a rei, mania chho tua," tahpata thlithla ta. **25** Chatawcha ano cha a yna ualua ta y ta, Zisu chachohna a hnipata a vaw hei ta a hnota, "Abeipa, ahy maw?" tah ta. **26** Zisu ta, "Viachha tlaw nypata ei pipa cha a cha awh," tah ta a chhy ta. Chatanachata viachha tlaw cha a ny khai nata, lah ta, Saimaw sawchapawpa Zuda Iskari pi ta. **27** Chatawcha viachha tlaw cha a pi tawna chata a chho liata Sata a ngia pa ha ta. Zisu ta a hnota, "Na tao awhpa cha tao parah te," tah ta. **28** Chatawcha tlakhai ka

latapazy chata ahyhma ta kheitazi ta a tahpa ma a cha tahpa pahno vei ei. **29** Thokha ta Zuda chata taka sahria a vaopa vata Zisu ta, "Kychhi chata hmo eima byupa mai chalei te," a tah tlyma; sipasapazy hnota khapaleipa pi awhpa a tah tlyma ama tah. **30** Chatawcha ano chata viachha tlaw cha lah ta, thlai pua pa ha ta.

Bipipa thipa

31 Zuda a pua tawta, Zisu ta rei ta, "Atahma cha Chysa Sawchapawpa paronasapata a y hawh, ano vata Khazopa chhao paronasapata a y, **32** ano liana chata Khazopa cha paronasapata a y ha khiatala, Khazopa ta anosasy liana chata ano cha a paronasa awh, thlai a paronasa awh. **33** Sawdaw sai u, buakhata nama hnota ei y chy. Namo ta eina tlua awh ei chi; chatawcha Zuzy hnota, 'Ei sina awhpa la a vy thei awh vei ei chi,' tahpa, ei reipa hawna khata, atahma cha hawna hra chata nama hnota ei rei. **34** Bipipa thipa ei cha pi ei hi, ky a pacha rairi ula; kei ta nama ky ei pachapa hawna heta, namo chhao ky a pacha rairi te u. **35** Nama ky nama pacha rairi khiatala, chysa zydua ta ei pachupazy nama chapa cha liana chata ama pahno awh," tah ta.

Pity a papha saina chhochhilina

36 Saimaw Pity ta a hnota, "Abeipa, khataila na si awh?" tah ta. Zisu ta, "Ei sina awhpa la, nama ta atahma na zi thei awh va chi; no hrota deikua cha eina zi awh chi," tah ta a chhy ta. **37** Pity ta a hnota, "Abeipa y, khazia atahma chhao ei cha zi thei awh vei? Nama vata ei hro ei thy awh," tah ta. **38** Zisu ta, "Keima vata na hro na thy awh ma? Hmeiseitata, hmeiseitata, ei cha chho, nama ta ei tho eina papha hia lei chi cha, aw kho awh vei," tah ta.

14

Zisu Paw lata sina lapi

1 "Nama pathipalo nopo kha se; Khazopa nama ngiapa na, kei chhao na ngiapa hra te u. **2** Ei Paw o liata yna hlupi a y; a y vei khiatala ei cha chho ha awhpa ei a cha, nama chata su a chhuady awhpata ei si awh hi. **3** Chatawcha nama chata su ei vaw tao khiatala, vaw kua hei awh na ta, ei hnota ei cha lah awh ei, ei yna liata namo chhao nama y thei nawpata. **4** Ei sina awhpa lapi nama pahno na," tah ta. **5** Thawma ta a hnota, "Abeipa, na sina awhpa pahno ma pi; a lapi kheita e eima pahno awh," tah ta. **6** Zisu ta a hnota, "Kei he lathlo nata hmeiseina nata hrona ei cha; keima lata a si leipa cha ahyhma ta Paw lata tlo bei vei ei. **7** Kei na pahnopa cha ula, ei Paw chhao nama pahno ha ba awhpa; atahma tawta ano cha nama pahno na, ano nama hmo hawh hra," tah ta. **8** Phili ta a hnota, "Abeipa, Paw cha keimo mania pahmosa te, chatanachata eima chata a dai awh," tah ta. **9** Zisu ta a hnota, "Phili, he cha dua he na hnota y na ta, chatana chhaota na pahno va chi ma? Ahyrai na hmopa cha Paw hmopa a cha; 'Paw cha keimo mania pahmosa te,' kheitazi ta a tahpa ma na cha? **10** Kei Paw liata ei ypa nata Paw keima liata a ypa zo va chi ma? Nama hnota he bi ei reipa he keima tao chhypata rei va na; Paw keima liata y ta, hmo tlo a tao ty. **11** Kei Paw liata ei ypa nata Paw keima liata a ypa he na ngiapa te u; cha leipata ei hmo taopazy chha angiapa te u. **12** "Hmeiseitata, hmeiseitata, ei cha chho ei chu, ahyrai na ngiapapa chata hmo ei taopazy he ano chhaota a tao hra awh; hezy hlata hmo ronapa chhao a tao awh, Paw lata ei si awhpa vata. **13** Ei mo ta khaparai nama hiapa mai cha ei tao lyma awh, Sawchapawpa vata Paw paronasapata a y thei nawpata; **14** namo ta ei mo ta khaparai nama hia khiatala, cha cha ei tao lyma awh.

Thlahpa Pathaipa taipa cha

15 "Namo ta ei ky eina pacha khia chi ta la, ei bipipazy nama ngia awh. **16** Chatawcha Paw hia awh na ta, ano chata Thlahpalotupa hropa a cha pi awh ei, chhazaw ta nama hnota a y awhpata, **17** cha cha hmeiseina Thlahpa cha a cha, khizaw ta cha cha hnei thei vei, ano hmo leipa ei ta, ama pahno hra leipa vata, namo ta ano cha nama pahno na, nama hnota y thla ha tlo ta, namo liana chata a y awh. **18** "Harapata cha sisai awh vei ei

na, nama hnota ei vy hei awh. **19** Bopi leipa tawta khizaw ta na hmo khao awh vei, chahrasala namo ta la eina hmo awh ei chi; keima ei hropa vata namo chhao nama hro hra awh. **20** Cha no liana chata kei ei Paw liata ei ypa zy, namo keima liata nama ypa zy, kei namo liata ei ypa zy nama pahno awh. **21** Ahyrai ei bipipazy hnei ta a zypha cha, ky na pachatupa a cha; ahyrai ei ky na pachapa cha ei Paw ta a ky a pacha awh," tah ta. **22** Zuda (Iskari a cha leipa) chata a hnota, "Abeipa keimo hnota a lua awh chi ta, khizaw hnota na lua tlo lei awhpa cha khazia?" tah ta. **23** Zisu ta a chhy ta a hnota, "Chysa ta ei ky eina pacha khiatala, ei bi a ngia awh ta, ei Paw ta ano cha a ky pacha awh ta, a hnota a vy awh pi ta, a hnota eima y thla ha awh. **24** Ahyrai ei ky na pacha leipa chata ei bipipazy zy vei; bi nama theipazy he keima ei cha vei, Paw na tuatupa ei tlo a cha. **25** "Nama hnota ei y chho heta he bizy he ei cha chho ei hi. **26** Thlahpalotupa, Thlahpa Pathaipa, Paw ta ei mo ta a vaw tua awhpa khata, cha chata a to cha pachu awh ei ta, nama hnota ei reipa zydua a cha patheisa pathi hei awh ei. **27** Thlahlona ei cha so pa ei hi; keima thlahlona ei cha pi ei hi; khizaw ta a pipa hawta ei cha pi leipa ei he. Nama pathipalo nopo kha se, chi rai chi kha se. **28** 'Si awh na ta, namo la ei vy hei awh,' ei cha tahpa ei kha nama thei hawh. Namu ta ei ky na pachapa cha ula, Paw lata ei si awhpa vata nama ly awhpa a cha; Paw cha keima hlata rona via tlo ta. **29** Atahma a vaw tlo hlata ei cha chho hawh ei hi, a vaw tlo tita nama ngiapa nawpata. **30** Nama hnota bi rei hlei khao awh va na, khizaw bei a vy tlo awh ta. Ano chata keima liata bi khapahma hnei vei: **31** chahrasala kei ta Paw ky ei pachapa nata Paw ta bi eina pipa lyma hawta hmo ei tao tahpa, khizaw ta ama pahnona awhpata a cha hi. Thyu te u, he tawtapa pua ei su u.

15

Zisu krezo hmeiseipa

1 "Kei krezo hmeiseipa ei cha, ei Paw sado mohotupa a cha. **2** Ei chia a pathei leipa mai thy ty ta, a patheipa mai a pathai ty, a pathei hlu rili

nawpata. **3** Nama hnota ei bi reipa vata atahma chhao nama pathai hawh. **4** Keima liata y thla ha te u, kei chhao namo liata ei y thla ha awh. A chia cha krezo liata a y thla ha leipa khiatala, ano deitata a pathei thei leipa hawta, namo chhao keima liata nama y thla ha leipa khiatala, pathei thei awh vei ei chi. **5** Kei krezo cha ei cha, namo a chiazzy nama cha. Ahyrai keima liata y thla ha ta, kei chhao ano liata ei y thla hana cha, cha cha a hlupi a pathei ty, keima leipata khapa hmatao thei tlo ei chi va. **6** Chysa keima liata a y thla ha leipa khiatala, a chia hawta thypata y ta, a ua ty; chatawcha pakhy ei ta, mei liata thy ei ta, a ka ty. **7** Namu keima liata y thla hapata, ei bi namo liata a y thla ha hra khiata cha, nama khopa mai hia te u, nama chata taopata a y lyima awh. **8** He vana heta ei Paw cha palyupalipata a y ty, a hlupi nama patheipa liana heta, chatanachata ei pachupazy nama cha awh. **9** Paw ta ky eina pachapa hawta kei chhaota nama ky ei cha pacha pa ei he; ei kypachana liata y thla ha te u. **10** Namu ta ei bipipazy nama zy khiatala, ei kypachana liata nama y thla ha awh, kei ta ei Paw bipipazy zy na ta, a kypachana liata ei y thla hapa hawna heta. **11** Ei lypa namo liata a y thla ha nawpa nata, nama lypa a ki nawpata, he bizy he nama hnota ei rei hi. **12** "He he ei bipipa a cha, kei ta nama ky ei cha pachapa hawta namo ta namo ky a pacha ula. **13** Chysa ta a viasa chata a hro a pi hlei tawta, kypachana tha viapa ahyhma ta hnei vei ei, **14** bi ei cha pipa mai nama tao khiatala, ei viasazy nama cha awh. **15** Sei cha tah khao awh vei ei na, a zibeipa hmotaopa sei ta pahno tlo va; viasazy tlo ei cha tah ei, Paw tawta hmo ei pahnopa zydua nama hnota phua ha tlo na ta. **16** Namu ta na tly vei ei chi, keima ta tlo cha tly ei na ta, pathei awhpa nata nama thei y thla ha awhpata ei cha rao hra ei; ei mo ta Paw lata nama hiapa mai, a cha pina awhpa ei ta. **17** Namosasy ta ky nama pacha rairi thei nawpata he bizy he ei cha pi ei.

Khizaw ahaona

18 "Khizaw ta a cha hao khia ei ta la, a cha hao hia chhaota, keima eina haopa nama pahno na. **19** Namu khizaw liatapa cha ula, khizaw ta ky a pacha awh ei; khizaw liatapa cha tlo lei kha ei chi ta, khizaw liatapa ei

cha tlypa ei vana heta, khizaw ta a cha hao ei. **20** 'Sei, a zibeipa hlata lai vei,' tahpa bi ei cha chho hapa ei kha a thei thla ha te u. Amo ta kei eina taola hawh khiatala, namo chhao a cha taola awh ei; ei bi ama zy khiatala, namo bi chhao ama zy awh. **21** Chahrasala he hmo zydua he ei mo vata nama chota ama tao awh, na tuatupa ama pahno leipa vata. **22** Kei a vypata ama hnota bi rei leipa awh sala, moleina ama hnei lei awhpa tlai; atahma deikua ama moleina liata reina awhpa hnei khao vei ei. **23** Ahyrai kei na haopa cha ei Paw a haopa a cha. **24** Hmo, mo hropa ahyhma tao bei leipazy ama hry liata tao leipa awh sala, moleina ama hnei lei awhpa tlai; atahma deikua amo ta kei nata ei Paw eima pano ta mania hmo hawh ei ta, mania ama hao hawh. **25** Khaparai cha sala ama rypa chabu liata amo ta, 'Khapa ky leipata eina hao ei,' tahpa bi ropa kha a vaw tlo nawpata a cha hi. **26** Paw tawtapa Thlahpalotupa nama hnota ei tua awhpa, Paw tawta a puapa hmeiseina Thlahpa cha a vaw tlo tita, ano chata ei bi a pahnosa awh; **27** namo chhaota nama pahnosa awh, a thaota tawta ei hnota nama ypa vata.

16

1 "Cha chapiasa lei awhpata he hmozy he nama hnota ei rei hawh hi. **2** Apakhynaozy tawta cha to awh ei ta; ahyrai cha thih awhpa maita Khazopa chota hmo pha a taopa hawta ama pacha awh, cha hawpa daiti cha a tlo awh. **3** Cha hawpa hmozy cha ama tao awh, Paw nata kei mania ama pahno leipa vata. **4** He bizy he nama hnota ei rei hawh hi, a daiti cha a vaw tlo tita ei cha chho hawh ei tahpa nama thei hei nawpata.

Thlahpa Pathaipa raihria

"He bizy he a thaota tawta ei cha chho leipa ei a cha, nama hnota ei ypa vata. **5** Atahma deikua cha na tuatupa la ei si awh; namo sahlao ahyhma ta, 'Khataila na si awh?' tahpata na hiahri tlo ei chi va. **6** He bizy he nama hnota ei reipa vata nama pathipalo cha pacharopata tlao bi ta. **7** Chahrasala bi hmeiseipa ei cha chho ei: ei si awhpa nama chata a pha na,

ei si vei khiatala Thlahpalotupa cha namo lata a vy aw h vei; ei si khiata deikua cha namo la ei vaw tua aw h. **8** Ano cha a vaw tlo nata moleina ky liata zy, siana ky liata zy, pachiana ky liata zy, khizaw ama thai leipa a pahnosa aw h; **9** moleina ky liata zy, kei eina ngiapa leipa vata; **10** siana ky liata zy, Paw la si aw h na ta, namo ta eina hmo khao lei aw hpa chi vana heta; **11** pachiana ky liata zy, he khizaw bei he thai leipata a tiu haw hpa vata. **12** "Nama hnota bi rei aw hpa a hlupi ei hnei, chahrasala atahma la pahni tlo lei kha ei chi ta. **13** Chahrasala ano hmeiseina Thlahpa cha a vaw tlo tita, bi hmeiseipa zydua liana cha a cha chhi aw h ei; ano tao chhypata bi rei aw h vei, bi a pahnopa mai cha tlo a cha chho aw h ei, hmo a vaw tlo aw hpa zy chhao a cha pahnosa aw h ei. **14** Ano chata kei eina paronasa aw h, kei tawtapa lah aw h ta, nama hnota a cha pahnosa aw h ei. **15** Paw ta hmo a hneipa zydua mai kei ei a cha, chavata kei ei tawtapa lah aw h ta, nama hnota a cha pahnosa aw h ei, ei tah.

[Pacharona thahphana lata a lina](#)

16 "Buakhata namo ta kei na hmo leipa aw h ei chi ta; buakhata lilaw ta, namo ta kei eina hmo hei aw h ei chi," tah ta. **17** A pachupazy thokha ta, "Eima hnota bi a reipa he khapa maw, 'Buakhata namo ta kei na hmo leipa aw h ei chi ta, buakhata lilaw ta, namo ta kei eina hmo hei aw h ei chi,' a tahpa nata, 'Paw lata ei si aw hpa vata,' a tahpa he?" a tah ei ta. **18** Amo chata, "He 'buakhata' a tahpa he khapa tahna ma a cha? A bi reipa he a pachana pahno ma pi," tah ei ta. **19** Ano ama hiahri kho tahpa Zisu ta pahno ta, ama hnota, 'Buakhata namo ta, kei na hmo leipa aw h ei chi ta, buakhata lilaw ta namo ta kei eina hmo hei aw h ei chi,' tahpata ei bi reipa he nama hiahri ma? **20** Hmeiseitata, hmeiseitata, ei cha chho ei chu, namo nama mothli tlah aw h ta, thata chah aw h ei chi ta, khizaw deikua cha ama ly aw h; namo pacharopata y aw h ei chi ta, chahrasala nama pacharopa cha alyna lata a vaw li aw h. **21** Chano ta saw a ze i nota a pacha a ro ty, a daiti a tlo haw hpa vata; chahrasala naw a pi patanata, a thlahzopa cha a thei khao ty vei, khizaw liata chysa a vaw pipa cha alypa vata. **22** Chatawcha atahma namo nama pacha a ro, chahrasala cha hmo hei aw h ei

na ta, nama pathipalo aly awh ta, nama lypa cha ahyhma ta cha lah pa awh vei ei. **23** Cha no liana chata namo ta khapahma kei na hiahri awh vei ei chi. Hmeiseitata, hmeiseitata, ei cha chho ei chu, Paw liata khaparai nama hia khiatala, keima mo ta a cha pi awh ei. **24** Atahma taita ei mo ta khapahma hia vei ei chi; hia te u, nama hmo awh, chatanachata nama lypa a ki nawpata.

Khizaw ei tia hawh

25 Cha bizy cha pakhopata nama hnota ei rei hawh; a daiti a tlo awh, cha tina chata nama hnota pakhonata bi rei khao leipa awh na ta, a siapatata Paw thati ei cha chho awh ei. **26** Cha no liana chata keima mo ta hmo nama hia awh; Paw lata kei ta ei cha haw pa awh ei, cha tah vei ei na; **27** Paw tlaita nama ky cha pacha tlo ei ta, namo ta ei ky na pacha ei chi ta, Paw tawta a puapa ei chapa nama ngiapapa vata. **28** Kei Paw tawta vaw pua ta, khizaw liata a vypa ei cha; khizaw sisaipata Paw la a di hei awhpa ei cha," tah ta. **29** A pachupazy ta, "Pacha te, atahmala a siapatata bi na rei na, a pakhona rai ta rei khao va chi! **30** Nama ta ato pahno chi ta, ahyhma ta hiahri byu va chi, tahpa atahma eima pahno hawh; he vana heta Khazopa tawta a puapa na chapa eima ngiapa na," tah ei ta. **31** Zisu ta a chhy ta ama hnota, "Atahma cha nama ngiapa hawh ma? **32** A daiti a tlo awh, a tlo hawh, cha tina chata namo o chyu lata pai khai awh ei chi ta, keima deitata eina pathlua awh ei chi; chahrasala Paw ei hnota a ypa vata keima deitata y tlo lei kha na ta. **33** He bizy he nama hnota ei rei hawh hi, keima liata thlahlopata nama y nawpata. Khizaw liana heta ritheipasapata nama y ty; chahrasala thlahlo ngaitapata y te u, kei ta khizaw ei tia hawh," tah ta.

17

A pachupazy chata Zisu thlahchhana

1 Cha hmozy cha Zisu ta rei ta, ava la uapata, "Ei Paw y, a daiti a tlo hawh; na Sawchapawpa paronasa te, Sawchapawpa ta a cha paronasa

nawpata, **2** chysa zydua chota bi hneipata na taopa khata ano hnota na pipa mai cha chhazaw hrona a pi thei nawpata. **3** He he chhazaw hrona a cha, na Khazopa hmeiseipa deita nata na tuapa Zisu Krista pahnopa hi. **4** Nama ta hmo tao awhpa eina pipa chi kha tao khai na ta, khizaw liata ei cha paronasa hawh; **5** hy ei Paw y, khizaw y hlata na liata a ronana ei hneipa khata atahma nama lia tlaita na paronasa te. **6** "Nama ta khizaw hry tawta a puapazy kei eina pipa chi hnona khata na mo ei palasa hawh; amo cha na ei ama cha, nama ta amo cha kei eina pi chi, amo chata na bi ama ngia hawh. **7** Nama ta hmo kei eina pipa mai na tawta a puapa a cha tahpa atahma ama pahno hawh; **8** nama ta bi eina pipazy chi kha ama hnota pi ha tlo na ta, chazy cha a ngia ei ta, na tawta a puapa ei cha tahpa a dopata pahno hawh ei ta; nama ta eina tua chi tahpa chhao ama ngiapa hawh. **9** Ama chata thlah ei chha; he khizaw chata thlah a chhapa cha va na, nama ta eina pipa sahlao chata tlao a cha; na ei cha tlo ei ta; **10** kei ei mai na ei a cha, na ei cha kei ei a cha, amo vata paronasapata ei y ty. **11** Chatawcha kei la khizaw liata y khao awh va na, he sahlao deikua he khizaw liata ama y awh, kei na la ei vaw di ha awh, ei Paw Pathaipa y, nama ta kei eina pipazy chi he na mo ta hrobi ma y, pokha ama cha thei nawpata, keimo hawna hra heta. **12** Ama hnota ei y chhona khata nama ta kei eina pipazy chi he, na mo ta ei hrobi ty; amo cha vai na ta, amo hry liata pakha hmata leidia vei ei, leidia sawchapawpa leipa khata cha, Khazopa cha bi a tlo nawpata. **13** Chahrasala atahma na la ei vy daima hawh; khizaw liata he bizy he ei rei, ei lypa amo liata ama hnei pakina awhpata. **14** Na bi ama hnota ei pi hawh; chatawcha khizaw ta amo cha a hao ei ta, khizaw liatapa ama cha leipa vata, kei khizaw liatapa ei cha leipa hawna hra heta. **15** Nama ta amo cha khizaw tawta na lah awhpata a hawpa cha leipa na ta, chysa moleipa tawna chata na hrobi awhpata ei tah. **16** Amo cha khizaw liatapa cha vei ei, kei khizaw liatapa ei cha leipa hawna hra heta. **17** Amo cha bi hmeiseipata pathaisa te; na bi cha hmeiseipa a cha. **18** Nama ta khizaw liata kei eina tuapa hawna chi khata, kei chhaota amo cha khizaw liata ei tua hi. **19** Amo vata keimasasy ta ei pathaisa, amo chhao bi hmeiseipata ama pathaisa awhpata. **20** "He sahlaozy chata deita a hawpa cha va na, ama bi vata kei na ngiapa

awhpazy chata chhao a hawpa ei cha, **21** ama zydua ta pokha ama chana awhpata, ei Paw y, na keima liata na ypa nata kei nama liata ei ypa hawna hra heta, amo chhao keimo liata ama yna awhpata, na ta kei eina tua chi tahpa khizaw ta ama zo thei nawpata. **22** Na ta ronanzay eina pipa chi kha, kei ta amo ei pi hawh, amo cha pokha ama chana awhpata keimo pokha eima chapa hawna hra heta, **23** kei amo liata, na, keima liata amo pokha ta ypata, ama paki thei nawpata, na ta kei eina tua chi tahpa nata ky eina pachapa hawna chi ta, amo he ama ky na pacha tahpa khizaw ta ama pahno thei nawpata. **24** Ei Paw y, nama ta kei eina pipazy chi he, ei yna liata ei hnota a y awhpata ei kho, nama ta eina pipa chi ei ronana kha ama hmo nawpata, aleilo y hia chhaota nama ta ky na pacha hawh tlo chi ta. **25** Hy ei Paw sia ngaitapa y, khizaw ta cha pahno leipa ei ta, kei deikua ta ei cha pahnopa kha; he sahlao chhao heta nama ta kei eina tua chi tahpa ama pahnopa kha. **26** Ama hnota na mo pahnosa na ta, ei pahnosa ty awh, nama ta kei ky eina pachana chi kha, amo liata y ta, kei chhao amo liata ei y thei nawpata," tah ta.

18

Zisu patusana nata patuna

1 Zisu ta cha bizy cha a rei khai **1** o nata, a pachupazy chhaota pua ei ta, Kidraw chava kao chakah ei ta, cha liana cha sado y ta, cha liana chata a ngia ei ta, ano nata a pachupazy chhaota. **2** A patusatupa Zuda chhao chata cha su cha a pahno; Zisu cha a pachupazy hnota cha liana chata charei ty tlo ta. **3** Chatanachata Zuda cha theithaipa abeizy nata Pharisaizy tawtapa pheisai sahlao nata hyutupazy chhao a chhi ta, meiozy, meireizy, chaihraizy chabahpata cha lana chata a vy ei ta. **4** Zisu ta a cho liata hmo a tlo awHPa zydua cha pahno thla ha ta, pua ta ama hnota, "Ahy nama tlua?" tah ta. **5** Amo chata a hnota, "Nazari Zisu," tah ei ta, a chhy ei ta. Zisu ta ama hnota, "Keima he ei cha," tah ta. Chatawcha a patusatupa Zuda chhao cha ama hryta a dua ta. **6** "Keima he ei cha," a tah patanata a sy ei ta, alei liata pao chy ei ta. **7** Ano chata ama hnota, "Ahy nama tlua?"

tah ta hiahri hei ta. Chatawcha amo chata, "Nazari Zisu," tah ei ta. **8** Zisu ta, "Keima he ei cha, tahpa ei cha chho ei mata; namo ta keima eina tlua khia ei chi ta la, he sahlao he a phapata pasisa te u," tah ta a chhy ta. **9** A bi reipa, "Nama ta kei eina pipa chi sahlao pakha hma pahlei va na," a tahpa kha a tlo nawpata. **10** Chatawcha Saimaw Pity ta zaozi a vao ta, phia ta, Theithai Beichaipa sei chhaw ta, a nahkao chacha la pathai ta, sei mo cha Malkusa cha ta. **11** Zisu ta Pity hnota, "Zaozi kha a pai liata kho te; Paw ta nyu eina pipa he do aw h va na ma?" tah ta.

Theithai Beipa hmiako liata Zisu a dua

12 Chatanachata pheisai sahlao chhaota ama hyutupa beichaipa chhaota Zuzy hyutupazy chhao chata Zisu patu ei ta, chahry ei ta. **13** Ana lata a chhi tua ei ta; Kaiapha pupa a chapa vata, Kaiapha cha cha ko liana chata Theithai Beichaipa cha ta. **14** Kaiapha cha chysa zydua vyupata mo pakha thih a pha tahpata Zuzy a pahruakheitupa kha a cha.

Pity ta a papha saina

15 Saimaw Pity ta Zisu zi ta, a pachupa hropa pakha chhaota, cha pachupa cha Theithai Beichaipa pahnopatheipa cha ta, Theithai Beichaipa o dopachho tlyhmia liata Zisu hnota a ngia hra ta, **16** chahrasala Pity cha khotho la ochhi kiapa liata a dua thla ha ta. Chatanachata pachupa hropa Theithai Beichaipa pahnopatheipa cha pua ta ochhi vaitupa bi chho ta, Pity pangiasa ta. **17** Ochhi vaitupa laisa chata Pity hnota, "Na chhao he chysa pachupazy hryta a hlao hrapa cha va chi ma?" tah ta. Ano chata, "Cha va na," tah ta. **18** Chatawcha seizy nata hyutupazy cha cha liana chata adua chyu ei ta, a chasipa vata meihei ta mei pati ei ta, a ai ei ta; Pity chhao ama hnota a hlao ta a dua hmata mei a ai hra ta.

Theithai Beipa ta Zisu a hiahrina

19 Theithai Beichaipa chata Zisu cha a pachupazy thati nata a pachunazi ky hiahri ta. **20** Zisu ta a chhy ta a hnota, "Khizaw chysa hnota vatla

pahnopata bi ei rei typa kha; apakhynao nata Khazopa achhynao, Zu zydua y pakhyana zy liana chata ei pachu typa kha; a rula ta khapahma rei va na. **21** Khazia kei eina hiahri chi? Ama hnota ei bi a theitupazy hiahri te; chazy chata ei bi reipa cha ama pahno mata," tah ta. **22** Cha cha a rei patanata a kiapa liata a duapa hyutupa pakha ta Zisu chabai ta, "Theithai Beichaipa he tana heta na chhy ma?" tah ta. **23** Zisu ta a hnota, "Bi do leipa a reipa ei cha khiatala, ei do leina na pahnosa te; chahrasala bi dopa ei reipa chhaota khazia eina chabai chi?" tah ta a chhy ta. **24** Ana chata a ku chahryna chota Theithai Beichaipa Kaiapha la tua ta.

Pity ta Zisu a paphasai heina

25 Saimaw Pity ta adua hmata mei a ai ta, "Na chhao a pachupa hryta a hlao hrapa cha va chi ma?" tah ei ta. "Cha va na," tahpata a papha ta. **26** Theithai Beichaipa sei pakha, **2** Pity ta a nahkao a pathaipa heinaw chata, "A hnota sado liana khata cha hmo va na ma?" tah ta. **27** Pity a papha hei ta; aw kho pa ha ta.

Pila hmiako liata Zisu a dua

28 Zisu cha Kaiapha o tawna chata abei o lata a chhi hei ei ta. My cha ta. Amo cha abei o liata a ngia vei ei, ama ngia khiata cha pathai leipa cha awh ei ta, Zawpakho pati ni thei awh vei ei. **29** Chatawcha Pila amo la kei pua ta, ama hnota, "He chysa cho liana heta bipeipa khapa nama hnei?" tah ta. **30** Amo chata a hnota, "He chysa he moleipa cha leipa sala nfc la a vaw chhi awh ma pi," tahpata a chhy ei ta. **31** Pila chata ama hnota, "Namo ta a chhi ula, nama rypa hawta a bi pachia te u," tah ta. Zuzy chata a hnota, "Keimo rei ta ahyhma thih hraopa cha vei," tah ei ta. **32** A thinazi awhpa ky Zisu ta a reipa hawta a tlo nawpata. **33** Pila cha a o la a ngia hei ta, Zisu aw ta a hnota, "Zuzy Beipa na cha ma?" tah ta. **34** Zisu ta, "He he nama palorupa ta a puapa ma na rei ma, mo hropa ta ama cha chhopa ma, keima ky he?" tah ta a chhy ta. **35** Pila ta, "Kei Zu chysa ei cha ma? Nama chizy nata theithaipa abeizy ta kei lata ama cha vaw chhipa a cha he;

khapa hmo na tao?" tah ta a chhy ta. **36** Zisu ta, "Ei khinara cha he khizaw liatapa he cha vei; ei khinara cha he khizaw liatapa he cha sala, na chakaotupazy ta ama dyu awh, Zuzy lata pipata ei y lei nawpata; chahrasala ei khinara cha he liatapa he cha vei," tah ta a chhy ta. **37** Pila ta a hnota, "Abei cha khia chi?" tah ta. Zisu ta, "Ei cha cha, abei ei cha mata, bi hmeiseipa pahnosapa he ei bi chhopa nata khizaw liata ei vy chhapa a cha. Ahyrai bi hmeiseipa liatapa maita ei bi ama zy ty," tah ta. **38** Pila ta a hnota, "Bi hmeiseipa khapa maw?" tah ta.

Zisu thih awhpata raona

Cha bi cha a rei khai patanata, Zuzy lata pua hei ta, ama hnota, "Khapahma a moleina hmo va na. **39** Chahrasala Zawpakho kychhi liata mo pakha ei cha papua pa awhpata rypa hnei ei chi ta; chatanachata Zuzy Beipa he cha papua pa awh ei sala nama kho ma?" tah ta. **40** Amo cha aw hei ei ta, "He chysa he cha kha se, Baraba kha tla cha se!" tah ei ta. Baraba cha phihmapa a cha.

19

1 Cha nona chata Pila ta Zisu a chhi ta, chhei ta. **2** Chatawcha pheisaizy chata hlo lakho tao ei ta, pakho ei ta, po sailawpa pabusa hra ei ta; **3** a kiapa la a vy ei ta, "Zuzy Beipa y, eima cha nao na!" tah ei ta, chabai ei ta. **4** Pila cha pua hei ta ama hnota "Mo te u, khapahma a moleina hmo va na tahpa nama pahno nawpata namo la ei vaw chhi hi," tah ta. **5** Zisu cha hlo lakho nata po sailawpa cha a buna chota vaw pua ta. Pila ta ama hnota, "Mo te u, chysa hi!" tah ta. **6** Theithaipa abeizy nata hyutupazy chata ano ama hmo patanata, aw ei ta, "Kraws liata khaipa te, kraws liata khaipa te!" tah ei ta. Pila ta ama hnota, "Namo ta sikhei ula, kraws liata khaipa te u, kei la khapahma a moleina hmo va na," tah ta. **7** Zuzy chata a hnota, "Eima rypa ky kha a y, cha rypa lyma hawta Khazopa Sawchapawpa ta a taopa vata a thi awhpa a cha," tah ei ta a chhy ei ta. **8** Pila ta cha bi a thei nata chi pachai ta; **9** a o la a ngia hei ta Zisu hnota, "Khataila ta chysa ma

na cha?" tah ta. Chahrasala Zisu ta a chhy vei. **10** Pila ta a hnota, "Nama ta kei na chho awh va chi ma? Cha pathli theipa ei cha, kraws liata cha khaipa theipa ei cha tahpa pahno va chi ma?" tah ta. **11** Zisu ta, "Cho la tawta pipa na cha vei khiatala, ei cho liana heta tao theipa rai hnei awh va chi; chavata na lata na pitupa khata a molei via," tah ta. **12** Cha rakha tawna cha Pila ta pathli a chhua ta, chahrasala Zuzy ta aw ei ta, "He chysa he na pathli khiatala Kaisara viasa cha awh va chi; ahyrai anosasy ta abei ta a taopa mai Kaisara adyupa ama cha," tah ei ta. **13** Pila ta cha bizy cha a thei patanata, Zisu a chhi ta, a mo Loparaipa, Hebrai rei deikua cha Kabatha ama tah, cha su liana chata ryureina dyuchhai liata a tyu ta. **14** Chatawcha cha no cha Zawpakho kychhi pachyno cha ta; my pati ni daiti no a cha. Pila chata Zuzy hnota, "Mo te u, nama Beipa hi!" tah ta. **15** Amo cha aw ei ta, "Pahleipadia te, pahleipadia te, kraws liata khaipa te!" tah ei ta. Pila ta ama hnota, "Nama Beipa he kraws liata ei khaipa awh ma?" tah ta. Theithaipa abeizy ta, "Kaisara leipata cha abei hropa hnei ma pi," tah ei ta a chhy ei ta. **16** Chatanachata Pila ta kraws liata khaipa awhpata ano cha ama hnota pi ha ta.

[Khaipana](#)

17 Chatanachata Zisu cha a chhi ha ei ta, anosasy chata kraws a pupata luru su ama tahpa, Hebrai rei ta Kolkotha ama tahpa cha, cha su taina chata pua ta. **18** Cha liana chata kraws liata khaipa ei ta, mo hropa pano chhao, a ka lata pakha rairi ta, a lia liata Zisu. **19** Pila ta cha ro ta, kraws pawhmao liata bai ta, "Nazari Zisu, Zuzy Beipa," tahpata ropa a cha. **20** Cha cha Zuzy thokha a hlupi ta rei ei ta, Zisu kraws liata ama khaipana su cha khipi kiapa cha ta; Hebrai rei ta zy, Rawma rei ta zy, Krika rei ta zy ropa cha tlo ta. **21** Zuzy theithaipa abeizy chata Pila hnota, "'Zuzy Beipa,' tahpata ro kha, 'Zuzy Beipa ei cha a tah,' tahpata tlo ro te," tah ei ta. **22** Pila ta, "Ei ropa kha ei ro khai hawh," tah ta a chhy ta. **23** Pheisaizy ta Zisu cha kraws liata ama khaipa khai nata, a chysiazy lah ei ta, su pali ta pachhai ei ta, pheisaizy ta su kha sai to ei ta; a viapakao lah hra ei ta. Viapakao cha bi leipa viapakao cha ta, a rao tawta a popa dua ta sapa a

cha; **24** chavata amo chata, "Hri kha ei su u, ahy chata ma tlo pachao ei su u," a tah chyui ei ta, Khazopa cha bi ta, "Ei chysiazy a rai ei ta, ei viapakao chata pachao ei ta," tahpa a tlo thei nawpata, cha hmozy cha pheisaizy ta tao ei ta. **25** Zisu kraws kiapa liata a no nata a no narono, Mari Klopa lapino nata Mari Madali a dua ei ta. **26** Zisu ta a no nata pachupa ky a pachapa kha a kiapa liata a duapa hmo ta, a no hnota, "Ei na, mo tua, na sawchapawpa khaw!" tah ta. **27** Chatawcha pachupa hnota chata, "Mo tua, na no khaw!" tah ta. Cha rakha tawna cha cha pachupa chata ano o lata a no cha a chhi ha ta.

Zisu thina

28 Cha tawna chata Zisu ta hmo ato atahma a ki hawh, tahpa pahno ta, Khazopa cha bi kha a tlo nawpata, "Ei da na a phi," tah ta. **29** Cha liana chata bei miakha kresawti thaopata a bipa patyu ei ta; chatanachata sponge miakha cha kresawti thaopa liata nypata hisaw chochahrei liata patao ei ta, a hmao papha ei ta. **30** Zisu ta kresawti thaopa cha a do khai nata, "A tlo hawh," tah ta; chatawcha a lu a ko ta, a thlahpa pathli ha ta.

Zisu ka liata ama cho

31 Pachyno a chapa vata a rizy cha pahano ta kraws liata a y thla ha lei nawpata, (cha pahano cha no ronapa cha tlo ta). Zuzy ta Pila hnota ama pheizy thlipata, ama ri sikhei awhpata a haw ei ta. **32** Chatawcha pheisaizy cha a vy ei ta, a hnota kraws liata ama khaipa pa tytuapa nata mo pakha cha ama pheizy thli ei ta: **33** chahrasala Zisu kiapa la a vy ei ta, a thi hawhpa pahno ei ta, a pheizy thli leipa ei ta. **34** Chahrasala pheisaizy hry liatapa pakha ta a ka liata a sei ta a cho ta, chatanachata thisai nata ti vaw pua pa ha ta. **35** A hmotupa chata a pahnosa hawh, a bi pahnosapa a do, a reipa a do tahpa anosasy ta a pahno, namo chhaota nama ngiapa nawpata. **36** Khazopa cha bi, "A ru miakha hma thlipa cha aw h vei," tahpa tlo nawpata cha hmozy cha a vaw y hawh. **37** Chatawcha Khazopa cha bi hropa ta, "Ama chop a cha ama mo aw h," tah hra ta.

Zisu pabuna

38 Cha hmozy hnolana chata Zawsi Arimathai khipa Zisu pachupa cha ta, chahrasala Zuzy a chipa vata a rula ta a ypa cha ta, ano chata Zisu ri cha lah awhpata Pila liata hia ta, Pila ta pasai ta. Chatanachata a vy ta a ri cha lah ha ta. **39** Nikadima, cha hlata za ta ano lata a vypa kha, myr nata aids a pahla chipa kho sy pangaw vaw cheipata, a vy hra ta. **40** Zisu ri cha lah ei ta, Zuzy pabunazi hawta khapaleipa ropahapazy chhaota po ri dipata pahly ei ta. **41** Chatawcha kraws liata ama khaipana su liana chata sado miakha y ta, sado liana chata ahyhma pazia bei leina thla thipa miakha a y. **42** Chatawcha Zuzy Pachyno a chapa vata thla cha ama kiapata liata cha tlo ta, cha liana chata Zisu cha pazia ha ei ta.

20

Thyuheina

1 Nosarino no hmiatua chaipa liata my ta, khi a pava hlata, Mari Madali cha thla lana chata vaw ta, alo cha thla tawta pasipata hmo ta. **2** A ra ta, Saimaw Pity nata pachupa hropa, Zisu ta ky a pachapa lana chata a vy ta, ama hnota, "Thla tawtapa kha Abeipa cha ama sikhei hawh, ama sona pahno tlo pi va," tah ta. **3** Chatanachata Pity cha pua ta, pachupa hropa chhaota, thla la pangai ei ta. **4** A ra kho ei ta, pachupa a hropa chata Pity chhao ta, thla cha tlo tua ta; **5** a bo ta, mo ta, po ri dipazy cha a y thla hapata hmo ta, chahrasala a chho la a ngia vei. **6** Saimaw Pity chhao a hnolata vaw tlo ta, thla chho la a ngia ta; po ri dipazy cha a y thla hapa nata **7** a lu liata ahruna po a ypa cha, po ri dipazy hry liata y leipata, chaty chipata su hro lata a ypa hmo ta. **8** Chatanachata pachupa hropa thla a tlo tuapa chhao cha a ngia hra ta, hmo ta, zo ta; **9** athipa hry tawtapa a thyu hei awhpa a cha tahpa, Khazopa cha bi kha pahno tlo ei va. **10** Chatanachata pachupazy cha ama o la a di ha ei ta.

Zisu, Mari Madali hnota aluana

11 Chahrasala Mari cha kotho la thla kiapa liata chahna chota a dua ta, chahna chota a bo ta thla chho la mo ta; **12** valyuchapa pano po ngyupa a bupata, Zisu ri paziana su liana chata, pakha a lu lata, pakha a pheii lata atyupa hmo ta. **13** Amo chata a hnota, "Chano, khazia na chah?" tah ei ta. Ano chata ama hnota, "Ei beipa sikhei hawh ei ta, ama sona ei pahno leipa vata," tah ta. **14** Cha hawta a rei patanata a hnola a hei ta, Zisu a duapa hmo ta, Zisu a cha tahpa pahno tlo leipata. **15** Zisu ta a hnota, "Chano, khazia na chah? Ahy na tlua?" tah ta. Ano chata sado mokhatupa khia ma tah ta, a hnota, "Papu y, ano he tawtapa na sikheipata a cha khiatala, na sona na chho te, ei lah thei nawpata," tah ta. **16** Zisu ta a hnota, "Mari," tah ta. Ano cha a hei ta a hnota Hebrai rei ta, "Rabawni!" tah ta. (Cha cha pachutupa tahna a cha). **17** Zisu ta a hnota, "Na patu kha, atahma tai chhaota Paw lata kia ma va na; anodeikuacha ei unawpazy la vaw la, ama hnota, 'Ei Paw nama Paw, ei Khazopa nama Khazopa la ei kia awh,' a tah na tah te," tah ta. **18** Mari Madali cha vaw ta, pachupazy hnota, "Abeipa cha ei hmo hawh," tah ta; a hnota bi a reipazy chhao cha chho ta.

[A pachupazy hnota Zisu a luana](#)

19 Cha no, nosarino no hmiatupa liata zala ta, Zuzy chipa vata pachupazy yna ochhizy cha ama khaw tawna chata, Zisu a vy ta ama hryta a vaw dua ta, ama hnota, "Nama cho liata thlahlona y maw sy," tah ta. **20** Cha a rei khai nata a ku nata a ka ama hnota pamosa ta. Chatawcha Abeipa cha ama hmo nata pachupazy cha aly hawh ei ta. **21** Zisu ta ama hnota, "Nama cho liata, thlahlona y maw sy. Paw ta kei eina tuapa haw hra ta, ei cha tua ei hi," tah hei ta. **22** Cha bizy cha a rei khai nata, ama cho liata a hu so ta, ama hnota, "Thlahpa Pathaipa hnei te u. **23** Ahy moleipa rai nama ngiathaipa mai, ngiathaipa a cha awh; ahy moleipa rai nama ngiathai leipa mai, ngiathai leipa a cha awh," tah ta.

[Thawma zo leina](#)

24 Zisu a vy nona khata pahrawhleinozy hryta a hlao hrapa, Thawma

(Maphi ama tahpa cha), ama hnota y leipata. **25** Chatanachata pachupa hropazy chata a hnota, "Abeipa cha eima hmo hawh," tah ei ta. Chahrasala ano chata ama hnota, "A ku liata thua khaina hmadawpazy kha hmopata, thua khaina hmadawpazy liata ei ku ta hriapata, a ka liata ei ku ta ei chapao leipata cha, zo aw h va na," tah ta. **26** No chari tawta a pachupazy cha o chho liata y hei ei ta. Thawma chhao ama hnota y hra ta. Chatawcha Zisu a vy ta, ochhizy cha a khawpa cha tlo ta, ama hryta a vaw dua ta, ama hnota, "Nama cho liata thlahlona y maw sy," tah ta. **27** Chatawcha Thawma hnona chata, "Na kudy ta vaw hria la, ei kuzy mo te; na ku vaw pazah la, ei ka liata chapao tua; zo leipata y leipa la, zo te," tah ta. **28** Thawma ta a hnota, "Ei Beipa nata ei Khazopa na cha!" tah ta a chhy ta. **29** Zisu ta a hnota, "Na ta eina hmopa va chi ta a ngiapapa na cha, hmo leipata a ngiapapa mai cha ama nohlao na," tah ta.

Chabu ta a chhuapa

30 Zisu ta pachupazy hmiako liana chata pahnona hropa hlupi tao ta, chazy cha he chabu liana heta ropa cha vei; **31** chahrasala hezy he Zisu cha Krista Khazopa Sawchapawpa a cha tahpa nama ngiapa nawpa nata a ngiapapata a mo liata hro nama hnei nawpata ropa a cha.

21

Pachupa pasari hnota Zisu aluana

1 Cha hnolana chata Taibiria Tipo liata Zisu a pachupazy hnota a lua hei ta; he tana heta a lua. **2** Saimaw Pity zy, Thawma Maphi ama tahpa zy, Kalili ra liata Kena khipa Nathanael zy, Zebadi sawchapawpa pano zy, a pachupa hropa pano chhaota hmaokha ta y ei ta. **3** Saimaw Pity chata ama hnota, "Nghah patu aw hpata ei si aw h," tah ta. Amo chata a hnota, "Keimo chhao na hnota eima si hra aw h," tah ei ta. Chatawcha si ei ta, baly liata kia ei ta, cha za liana chata khapahma patu vei ei. **4** Chatawcha khi pava chyta, Zisu raphyu liata a dua ta; chahrasala pachupazy chata Zisu a cha tahpa pahno tlo ei va. **5** Zisu ta ama hnota, "Ei nawta sai u, nipa

khapaleipa nama hnei ma?" tah ta. Amo chata a hnota, "Hnei ma pi," tah ei ta a chhy ei ta. **6** Ano chata ama hnota, "Baly ka la chacha lana khata sao vaw ula, nama hmo awa," tah ta. Chatawcha vaw ei ta, ngah a hlu ngaitapa vata a daophi thei khao leipa ei ta. **7** Pachupa Zisu ta a ky a pachapa khata Pity hnota, "Abeipa a cha hao!" tah ta. Abeipa a cha tahpa Saimaw Pity ta a thei patanata, a po a sai ta, thluahruapa ta a ypa cha tlo ta, tipo liata a zaw pathla ta. **8** Chahrasala pachupa hropazy chata baly chypata ta sao ngah chhaota a daophipata vaw pangai ei ta, ngiaka tawta a hia tlo lei kha ei ta, dy za no tlyma deita cha ta. **9** Chatawcha ngiaka ama pua patanata, cha liana chata meihei ta mei patipa hmo ei ta, a cho liata ngahsa nata viachha raopa chhaota. **10** Zisu ta ama hnota, "Atahma ngah nama patupa kha vaw chei ba te u," tah ta. "Saimaw Pity kia ta sao cha ngah laipapi ta a bipata ngiaka la a daophi ta, za kha nata syngaw nata miatho a cha; cha tlatluta y hrasala, sao cha a hri vei. **12** Zisu ta ama hnota. "My pati vaw ni te u," tah ta. Chatawcha pachupazy hry liata ahyhma ta, "Ahyhma na cha?" tahpata hiahri nga vei ei. Abeipa a cha tahpa pahno thla ha ei ta. **13** Chatawcha Zisu a vy ta, viachha cha lah ta, ama hnota pi ta, ngahzy chhao cha cha hawna chata pi hra ta. **14** Cha cha Zisu athipa hry tawta a thyu hei tawta pachupazy hnota a luana ei thona a cha.

[Ei mitakupazy pasa te](#)

15 My pati ama ni khai nata Zisu ta Saimaw Pity hnota chata, "Saimaw, Zawhana sawchapawpa, hezy hlana heta na ta ei ky eina pacha via chi ma?" tah ta. Ano chata a hnota, "Y, Abeipa y; na ky ei cha pacha tahpa na pahno na," tah ta. Ano chata a hnota, "Ei mitakupa tawhzy pasa te," tah ta. **16** A ei nona ta a hnota, "Saimaw, Zawhana sawchapawpa, na ta ei ky eina pacha chi ma?" tah hei ta. Ano chata a hnota, "Y, na ky ei cha pachapa na pahno na," tah hei ta. Ano chata a hnota, "Ei mitakupazy moho te," tah ta. **17** A ei thona liana chata a hnota, "Saimaw, Zawhana sawchapawpa, na ta ei ky eina pacha chi ma?" tah ta. Chatawcha a ei thona liata, "Na ta ei ky eina pacha chi ma?" a tahpa vana chata, Pity a pacharo ta, a hnota, "Abeipa y, ato pahno chi ta; na ky ei cha pachapa na

pahno na," tah ta. Zisu ta a hnota, "Ei mitakupazy pasa te. **18** Hmeiseitata, hmeiseitata, ei cha chho, na hawti nona khata na ehai a sai chi ta, na khona la maita si ty chi ta; chahrasala na macha tita na kuzy pazaw awh chi ta, mo hropa ta na chai cha sai awh ei ta, na kho leina lata ama cha daophi awh," tah ta. **19** Cha bizy cha kheitazi ta thipata ma Khazopa a palyupali awh tahpa pahnosana a rei. Cha cha a rei khai nata a hnota, "Na zi te," tah ta.

Pachupa kypachapa

20 Pity cha a hei ta, Zisu ta pachupa ky a pachapa za pati ni nota a chachohna a hnipata a vaw heipata, "Cha patusatu awhpa cha ahyma a cha?" a tahtupa khata a vaw zipa hmo ta. **21** Pity ta ano cha hmo ta, Zisu hnota, "Abeipa, he chysa he kheita ma a cha awh?" tah ta. **22** Zisu ta a hnota, "Ei vy heina taita a y thla ha awhpa chhochhi kho awh sala, cha cha khapa ma a cha cha pa awh? Na ta na zi thla ha te!" tah ta. **23** Cha pachupa cha thi lei awhpata a bi cha unawzy hry liana chata patha ha ta; chahrasala Zisu ta thi awh vei tahpa a hnota rei tlo va, "Ei vy heina taita a y awhpa chhochhi kho awh sala, cha cha khapa a cha cha pa awh?" a tahpa cha tlo ta. **24** Cha pachupa cha he bizy pahnosatupa nata rotupa he a cha; a bi pahnosapa he a do ngaitapa a cha tahpa eima pahno na. **25** Chatawcha hezy leipa heta Zisu hmotaopa hropa hlupi a y; chazy cha ro khaipa cha sala chabu ro awhpa zydua cha khizaw liana chhao heta a tlopata pangiasa va na.